

		JANUARI
		TH
		Q
		Thi
		visit http://c
	I.	Introitus.
	II.	De Ortu Mundi
	III.	De Elementis.
	IV.	De Firmamento
	V.	De Igne.
	VI.	De Meteoris.
	VII.	De Aquis.
	VIII.	De Terra.
	IX.	De Lapidibus.
	X.	De Metallis.
	XI.	De Arboribus et
	XII.	De Herbis tam l quam silvestrib
	XIII.	De Fruticibus.
	XIV.	De Animalibus: Avibus.
	XV.	De Aquatilibus.
	XVI.	De Iumentis.
	XVII.	De Feris.

XVIII.	De Amphibiis et Reptantibus.
XIX.	De Insectis.
XX.	De Homine.
XXI.	De Corpore et partibus Membris externis.
XXII.	De Membris internis.
XXIII.	De Accidentibus.
XXIV.	De Morbis.
XXV.	De Ulceribus et Gangenis.
XXVI.	De Sensibus externis.
XXVII.	De Sensibus internis.
XXVIII.	De Mente.
XXIX.	De Voluntate et Libero Arbitrio.
XXX.	De Mechanicis instrumentis.
XXXI.	De Hortorum Cultu.
XXXII.	De Agricultura.
XXXIII.	De Molitura et Moli.
XXXIV.	De Panificio.
XXXV.	De Pecuaria.
XXXVI.	De Laniena (Lanificio).
XXXVII.	De Venatura.
XXXVIII.	De Piscatione.
XXXIX.	De Aucupio seu Captura.
XL.	De Coquinaria.
XLI.	De Potulentorum (Paratura).
XLII.	De Aurigatione.
XLIII.	De Navicularia.
XLIV.	De Itineribus.
XLV.	De Mercatura.
XLVI.	De Vestiariis Opibus.
XLVII.	De Variis Vestimentis (Vestium) Generibus.
XLVIII.	De Architectura Artificiis.
XLIX.	De Domo ejusque partibus.
L.	De Hypocausto.
LI.	De Coenaculo.

LII.	De Cubiculo cum Pertinentibus.
LIII.	De Balneo et Munditia (Munditie).
LIV.	De Coniugio et
LV.	De Puerperio.
LVI.	De Cognatione.
LVII.	De Oeconomia.
LVIII.	De Urbe.
LIX.	De Templo.
LX.	De Ecclesia.
LXI.	De Ethnicorum Iudaeorumque Superstitionibus
LXII.	De Curia.
LXIII.	De Iudiciis.
LXIV.	De Maleficis et
LXV.	De Statu Regio.
LXVI.	De Regno et Reg
LXVII.	De Pace et Bello
LXVIII.	De Schola et Ins
LXIX.	De Museo.
LXX.	De Grammatica
LXXI.	De Dialectica (L
LXXII.	De Rhetorica et
LXXIII.	De Mathesi et p Arithmetica.
LXXIV.	De Geometria.
LXXV.	De Mensuris et
LXXVI.	De Optica et Pic
LXXVII.	De Musica.
LXXVIII.	De Astronomia
LXXIX.	De Geographia.
LXXX.	De Historia.

LXXXI.	De Medicina.
LXXXII.	De Ethica in Ge
LXXXIII.	De Prudentia.
LXXXIV.	De Temperantia
LXXXV.	De Castitate.
LXXXVI.	De Modestia.
LXXXVII.	De Autarkeia.
LXXXVIII.	De Iustitia: et p Commutativa.
LXXXIX.	De Iustitia Distr
XC.	De Fortitudine.
XCI.	De Patientia.
XCII.	De Constantia.
XCIII.	De Amicitia et I
XCIV.	De Candore.
XCV.	De Conversatio
XCVI.	De Ludicris.
XCVII.	De Morte et Sep
XCVIII.	De Providentia
XCIX.	De Angelis.
C.	Clausula.

JANUA LINGUARUM
RESERATA.

I. INTROITUS.

1. Salve, lector amice.
2. Si rogas quid sit
eruditum esse, responsum
habe:
*Nosse rerum differentias et
posse unumquodque suo
insignire nomine.*
3. Nihilne praeterea?
Nihil certe quidquam.

4. Totius enim eruditionis ac literaturae fundamenta posuit qui nomenclaturam naturae et artis perdidicit.

5. Sed id difficile forsitan?

6. Est, si invitus feceris aut praeveniente imaginatione (praeconceptione) te ipsum terrueris.

7. Tandem si quid asperitatis erit, initio erit.

8. Annon et literarum characteres (ductus) pueris primo intuitu mira monstra videntur?

9. Ast ubi paululum impenderint operae, ludum et jocum esse animadvertunt.

10. Idem in omni re evenit, ut aspectu exteriori operosa appareat.

11. At si aggredi pergas, nihil est quod non cedat, se subdat ingenio.

12. Qui cupit, capit
omnia.

13. Agedum itaque
quisquis es, sperare te
jubeo, desperare veto.

14. En, vide exiguum hoc
opusculum.

15. Heic tamen tibi (absit
verbo gloria) universum
mundum Latinamque
linguam velut in enchiridio
(breviario) ostendam.

16. Tenta quaeso; evolve
et edisce aliquot has
pagellas.

17. Facto hoc (cum hoc
feceris), oculatum ac
perspicacem te ad omnia
humanitatis studia re ipsa
comperies.

II. DE ORTU MUNDI ET CREATIONE PRIMAEVA.

18. Deus ineffabili sua
omnipotentia creavit omnia
ex nihilo.

19. Principio enim expandit (extendit) vastissimam abyssum, hoc est spatium, ubi coelum et terra existunt.

20. Et replevit eam tenebricosa quadam et informi caligine.

21. Ex qua tanquam materia formavit creaturas corporeas, distinctas formis, et vestitas accidentibus variis, prout cujusque ideam intra se conceperat.

22. Implantavitque cuique naturam suam, id est vim observandi assignatum locum, modum, genusque suum.

III. DE ELEMENTIS.

23. Ante omnia vero confusum istud chaos secundum densitatis et raritatis gradus in quatuor species separavit (segregavit).

24. Tenuissimam et subtilissimam partem fecit lucidam et calidam et appellavit ignem seu lucem.

25. Aliam iterum tenuem, pellucidam, et tepidam dixit aërem.

26. Tertia portio fluida et frigida fuit aqua.

27. Sub qua mansit sedimentum crassum, limus seu terra.

28. Atque haec sunt simplicia corpora, ex quibus composita (mixta) exsurgunt.

29. Omnia enim reliqua ex his constant.

30. Quippe ex iis generantur, iis nutriuntur, in eadem dum corrumpuntur resolvuntur.

IV. DE FIRMAMENTO.

31. Astra sunt veluti lampades in aethere suspensa, ut indefinenter circumcircarotatae, lumine suo tenebras illuminent, cursu autem temporum vices dimetiantur.

32. Planetae, quorum ordinem hi versiculi complectuntur, sunt septem:

Luna, Mercurius, Venus, Sol, Mars, Jupiter, Saturnus.

Quisque in peculiari suo orbe.

33. Infima est ☾ Luna, quae incrementa et decrementa pati videtur, retardationeque menses efficit.

34. ☉ Sol, jubare corusco radians, ab oriente per meridiem in occidentem festina celeritate revolutus, revolutione sua dies viginti quattuor (24) horis, et annos duodecim (12) mensibus, quinquaginta duabus (52) hebdomadibus, trecentis sexaginta quinque et quadrate (quarta parte) ($365 \frac{1}{4}$) diebus definit.

35. Ortum ejus praecedit aurora et diluculum, quum diescit et lucescit.

36. Occasum (obitum) sequitur crepusculum (hoc est crepera lucula) quum vesperascit et noctescit.

37. Ascendens ad verticem nostrum supernum (qui vulgo zenith, cui inferus vulgo nadir opponitur) seu declinans ab aequinoctiali

ad Tropicum Cancrisive
solstitialem facit ver,
rursumque ad Tropicum
Capricorni sive hiemalem
descendens, autumnum: et
utrobique aequinoctium.

38. Imus dat brumam,
orditurque hiemem;
summus solstitium,
inchoatque aestatem, ubi
Sirius (canicula, seu
caniculae stella) excitat
aestum.

39. ☿ Mercurius eum in
eccentrico epicyclum
vectante circuit citius quam
semi anno. Sic quoque
venusta ♀ Venus, sed
sesqui anno.

40. Hanc mane Luciferum
(Phosphorum), vesperi
Hesperum sive
Vesperuginem vocant.

41. ♂ Mars ignitus
periodum suam biennio
ferme percurrit. Splendidus
♃ Iupiter suam pene
(paene) duodecim
pervagatur. Gelidus ♄
Saturnus tantum non
triginta. Et ab his erroneis
dies hebdomadis
nomenclationes sortiti sunt:

- dies Solis
(Dominicus, —
ca),
- dies Lunae,
- dies Martis,
- dies Mercurii,
- dies Iovis,
- dies Veneris,
- dies Saturni.

42. Eclipses
(obscuraciones) luminarium
fiunt propter
interpositionem tertii non
tralucentis, indeque orta
obumbratione.

43. Stellae fixae cum
octava sphaera aequaliter
progrediuntur, sed
inaequaliter coruscant.

Harum in firmamento
circumsecus praecise
numerantur mille viginti
duo (1022), praeter tres in
Cincinno (Comae)

Berenices:

- primae
magnitudinis sunt
quindecim (15),
- secundae
quadraginta
quinque (45),
- tertiae ducentae
octo (208),
- quartae
quadringentae
septuaginta
quattuor (474),
- quintae ducentae
septendecim (217),
- sextae quadraginta
novem (49),
- nebulosae quinque
(5),
- obscuriores novem
(9).

❖ Sitae sunt vel in Zodiaci
signis XII:

1. In ♈ Ariete 13 et 5
informes

2. In ♉ Tauro 32 et 11,
inter quas est prim.

mag. (prima magnitudinis) oculus Tauri, ubi nota Pleiadas (Vergilias) (quae septem dici, sex tamen esse solent) et Hyadas (Suculas), pluvium sidus, aliter Palilitium.
3. In ♊ Geminis 18 et 7.
4. In ♋ Cancro 9 et 4.
5. In ♌ Leone 27 et 8, ubi p. m. sunt cor et cauda.
6. In ♍ Virgine 26 et 6, ubi prim. mag. est spica Virginis.
7. In ♎ Libra 8 et 9.
8. In ♏ Scorpio 21 et 3.
9. In ♐ Sagittario 31.
10. In ♑ Capricorno 28.
11. In ♒ Aquario 42 et 3.
12. In ♓ Piscibus 34 et 4, ubi una prim. mag. in ore piscis austrini.
❖ Vel extra Zodiacum:
I. Boreales.
1. In Ursa Minore (Cynosura) 7.
2. In Ursa Majore (Helice) 27 et 8.
3. Dracone 31.
4. In Cepheo 11 et 42.
5. In Boote (Arctophylace) 22 et 1, ubi prim. mag.

Arcturus.
6. In Corona Borea 8.
7. In Engonasi (Hercule) 28 et 1.
8. In Lyra (Vulture Cadente) 10, ubi prim. mag. est Lyrae Fidicula.
9. In Olore (Cygno, Ave, Gallina) 17 et 2.
10. In Cassiopea 13.
11. In Perseo 26 et 3.
12. In Auriga 14, ubi est prim. mag. Capella (Hircus).
13. In Ophiucho (Serpentario) 24 et 5.
14. In Serpente Ophiuchi 18.
15. In Sagitta (telo) 5.
16. In Aquila (Vulture Volante) 9 et 6, quae constituunt Antinuum.
17. In Delphino 10.
18. In Equuleo (Equi Sectione) 4.
19. In Pegaso (Equo Alato) 20.
20. In Andromeda 23.
21. In Triangulo (Deltoto) 4.
II. Australes.
1. In Ceto 22.
2. In Orione 38, ubi sunt prim. mag. humerus dexter, et pes sinister Orionis.
3. In Eridano (fluvio Nilo) 34, ubi est prim. mag. Eridanus.
4. In Lepore 12.
5. In Cane Majore 18 et

11, ubi prim. mag. Canis Cadens (Sirius).
6. In Procyone 2, ubi est prim. mag. Canis.
7. In Argo (Nave) 45, ubi est prim. mag. Canopus.
8. In Hydra 25 et 2.
9. In Cratere (Patera Urna) 7.
10. In Corve 7.
11. In centauro Chirone 37, ubi prim. mag. pes centauri.
12. In Bestia Centauri (Lupo) 19.
13. In Ara (Thuribulo, Lare) 14 et 7.
14. In Corona Austrina (Rota Ixionis) 13.
15. In Pisce Austrino (Notio) 11 et 6.
Poli axes sunt duo: arcticus (boreus) et antarcticus. Horizon (finitor) dividit himsphaerium inferius a superiore.
V. DE IGNE.
44. Incendium ex quavis scintilla, si permittis, oritur.
45. Nam quicquid ignem concipit, id primum gliscit, dein ardet, tum flagrat et flammat, postremo crematum redigitur in favillas et cineres.

46. Lignum ardens torris
appellatur; extinctum,
titio; particula ejus, carbo;
et quamdiu candet, pruna.

47. Fumus ardens flamma
est; camino insidens, fuligo,
saepissime abradenda ne
ignescat.

VI. DE METEORIS.

48. Vapores aquosi
perpetuo sursum feruntur.

49. Ex his densatis fit
nubes; aut si haec deorsum
labitur, nebula.

50. Inde pluit, ningit,
grandinat.

51. Pluvia destilat lente,
imber dense, nimbus
impetuose.

52. Hic, si inter
decidendum (delabendum)

gelascit, fit grando; si
incalescit nimium, uredo
seu rubigo.

53. Pruina est congelatus
ros; stiria, stilla rigens.

54. Nives ex guttulis
spumescunt concretae
segetem operiunt, ne gelu
vel glacie algeat.

55. Aura cum spirat,
focillat nos, et gelata
regelat. Ventus vehemens
et impetuosus cum flat,
quatit, prosternit, et proterit
quoquo se vertit.

56. Cardinales venti sunt:

- subsolanus
(orientalis),
- auster (notus
meridionalis),
- favonius, sive
xephyrus
(occidentalis),
- et aquilo
(aparctias, boreas,
septentrionalis).

Collaterales sunt:

- vulturnus, ab oriente brumali;
- Africus (libonotus, libs), ab occasu brumali;
- corus (argestes), ab occasu aestivo.
- caecias, ab ortu aestivo;

57. Circius et turbo in gyrum se mirifice circumagunt.

58. Exhalationes sulphureae incensae edunt fulgura (fulgetra) et chasmata.

59. Et tum caloris cum frigore pugna tonitrua ciet cum fragore terribili.

60. Emicans inde flamma fulmen nuncupatur.

61. Quod sive sit urens sive discutiens, momento se dissipat, et quicquid eo icitur, corrui.

62. Quum fulgurat [et] fulminat, quis non attonitus pavescat?

63. Cometa nullus
unquam fulsit, quin
sterilitatem inureret terris
aut infectionem.

64. Iris matutina (ut et
halo) nubilosam, vespertina
serenam tempestatem
(sudum) nunciat.

VII. DE AQUIS.

65. E laticibus scatentes
(scaturientes) saliunt
fontes, unde rivi manant.

66. Ex his denique,
praecipue ubi plures
concurrunt, colliguntur
fluvii (flumina), jugiter
intra ripas suas decurrentes
nisi quum aggeres
aquarum eruptionibus
coërcendis non sufficiunt.

67. Ast sicubi profluvio et
decursu carent, tument et
in stagna atque aquam
residem se diffundunt.

68. Paludes sunt
scaturigines sine fluxu.

69. Torrentes sunt aquae
pluviales rapide defluentes,
a quibus exundationes et
diluvia.

70. Aquam, ubi fluit,
fluentum; ubi gyratur,
gurgitem et vorticem; ubi
seipsam absorbet,
voraginem; ubi expers
fundi est, barathrum dicito.

71. Si illam natatu
plaudis, infuscas. Sed
claram et quietam turbari
quid refert?

72. Bulla fit a stillante
gutta.

73. Mare salsum est, ut
muria satura.

74. Ubi tellurem terminat,
sinus, promontoria, et
isthmi sunt.

75. Undae ejus ab
intraneo aestu sex horis
fluunt ad littora
refluuntque reciproce
(alternant) cum sonitu
horribili: maxime intra freta
atque ad charybdes.

76. In boreali plaga
oceanus est glacialis
(hyperboreus).

VIII. DE TERRA.

77. Terrae superficies
alicubi uda est et uliginosa,
alicubi arida et petrosa.

78. Nonnullibi plana, seu

planities (aequor). Alibi montes, valles, convalles, tumuli, et depressa loca, hiatus et antra conspiciuntur.

79. Colles et clivi cacumen versus euntibus acclives sunt, declives retro.

80. Terrae motus fit a subterraneis flatibus qui, si prorumpunt foras, labes fiunt.

81. Glebam, si teris et frias, pulvis erit: si diluis et maceras, lubricum lutum.

IX. DE LAPIDIBUS.

82. Lapis comminutus arena est. Quae si crassior sit, sabulum et glarea vocatur; rudus sunt assulae, seu secamenta (fragmina) petrarum.

83. Saxa humi jacent (sive exstent sive delitescant). Scopuli et cautes fragosae et inaccessae eminent, crepido prominet.

84. Scrupulus calceo
illapsus, nisi eximatur,
urget moleste.

85. Cote acuimus obtusa,
silice elidimus ignem,
Lydio lapide metalla
probamus.

86. Tophus arenosus, et
scaber friabilis est; pumex
spongiosus, exesus, et
bibulus, lotioni sive
frictioni subserviens.

87. Alabastrites
candidissimum marmor.

88. Magnes, eique affricta
lingula pyxidis nauticae,
septentrioni directe se
obvertit, alicubi tamen a
meridiano deviat, ad
cardinem occiduum vel
ortivum deflectens.

89. Gemmarum
preciosissima est
carbunculus (pyropus),
secunda ab illa adamas,
tum eranus, post sapphirus,
smaragdus, jaspis,
hyacinthus, onyx,
sardonyx, etc. qui angulati
micant et scintillant. Bezoar
et lachryma cervina
pestiferum virus ac

venenosa dispellunt.

90. Haematites, alectoria, aëtites, bufonius, sarda, lazulus sequiores sunt.

91. Margaritae et uniones (qui grandiusculi sunt) in conchis reperiuntur. Horum lineis luxuriantes mulierculae sese incingunt, tum etiam perforatis auriculis eosdem illigant.

92. Corallia sunt arbusculae marinae ramusculi.

93. Vitrum tralucens crystalli similitudinem habet, non duritiem: scinditur smyrite.

X. DE METALLIS.

94. Metalla e fodinis eruuntur (effodiuntur): e quibus quia liquescunt, et rursus consistunt (spissantur), varia conflantur.

95. Aurum est perfectissimum: quia purissimum, ac ponderosissimum: praesertim obryzum.

96. Catino immissum,

atque clibano vel centies recoctum, ne hilum quidem substantiae (essentiae) deperdit.

97. Argentum huic proxime accedit, quum purum putum est; sed scorias habet, quae amburuntur. Exusto autem intertrimento emundatum fit ductile.

98. Ferrum, utut durissimum, ferrugine arroditur: depurgatum et induratum aliquoties, chalybs dicitur.

99. Cupro adhaeret aerugo, ob vividam viriditatem ad tincturas expetita.

100. Orichalcum pervulgata usurpatione est cadmia tinctum aes: fundi solum potest, non tenuari in lamellas, ob friabilitatem.

101. Electro stannum, et hoc plumbum mollius et vilius est.

102. Argento vivo
(hydrargyro) nihil
mirabilius: liquidum est,
nec tamen madet.

103. Nam sive id super
aliquid effundas, sive ei
aliquid immergas, sive
aspergas, nihil madescit.

104. Sal, alumen,
vitriolum (chalcanthum),
nitrum, sulphur, bitumen
(asphaltites), naphtha,
cinnabaris, arsenicum,
stibium (antimonium),
ochra, chrysocolla, creta,
plumbago, rubrica, etc.
succu metallici dicuntur.
Cerussa et minium
adulterinum factitia sunt;
sic quoque chrysocolla,
aurificum glutinum.

XI. DE ARBORIBUS ET FRUCTIBUS.

105. Planta fibris radicum
humorem imbibens, alescit,
viget, frondescit, et floret.

106. Eo destituta, languet, flaccescit, marcescit, arescit illico.

107. Fastigium est vertex seu cacumen: stirps dicitur, quatenus se in ramos et frondes pandit.

108. His desectis, trunci, et caudicis, et stipitis nomen habet: termes est ramusculus cum fructibus decerptus sive revulsus: ramale autem ab arbore rejectus.

109. Exstrinsecus cortex: intrinsecus liber est: qui dum viret, glubi potest: medulla est intima.

110. Arboribus folia delabuntur, et crescunt, praeterquam gummosis, quae continuo (usque et usque) vernant, ut buxus, taxus (smilax), etc.

111. Pomus (malus), pirus, cerasus, prunus, oliva (olea), arbores sunt

sativae: fraxinus, fagus,
alnus, ornus, silvestres.

112. Illae fructiferae:
harum pleraeque steriles;
ut, betula, populus alba,
populus nigra.

113. Quaedam exuberante
foliosa et frondosa luxurie
umbriferae sunt, vireta
quibus innascuntur,
opacantes; nominatim, tilia,
platanus, ulmus, et caetera
latifolia.

114. Salix dat vimina,
quorum contextu corbes et
crates fiunt.

115. Abies procera est, ut
et picea, larix, cupressus,
cedrus.

116. Palma, si curvatur, eo
validius in sublimine
nititur.

117. Gemma hians
(dehiscens) florem, in quo
apex (stamen), sed in fico
grossulum protrudit. Flos
fructum; qui ubi postea
maturescit, carpitur aut
decutitur, aut per se decedit
fracescens.

118. Quidam sunt
praecoces, alii serotini
(cordi), quidam perennes,
ut juniperus: eduntur
autem vel recentes, vel
vieti, vel fracidi.
asservantur in oporotheca,
et oporophylacio.

119. Cerasa oblongis
petiolis (pediculis) pendent:
aproniana breviusculis.

120. Mespila sunt
lanuginosa: pyra
succulenta: pruna
damascena, armeniaca,
persica, cerina, nana,
silvestria, ossiculata sunt.

121. Putamen amoveat, et
nucem, si cassa non est,
nucifrangibulo frangat
oportet, qui nucleum esse
vult: sive sit juglans, sive
avellana (quam fert

corylus) sive tribulus, sive amygdalum (amygdala).

122. Suber et ilex glanes, quercus etiam gallas, castanea castaneas echinatis operculis convestitas, pinus strobilos, cornus corna, laurus, acer, et sorbus baccas ferunt.

123. Sorba, siliquae, et cydonia (cotonea), aurantia, citrea, limonia, et punica (granata) mala stipant (adstringunt, oppilant), ficus, fraga, mora (mora mori), mora rubi, mora rubi Idaei, mora myrti (myrta) et myrtilli (vaccinia), laxant lubricantque. Lotos degustata oblivionem inducit.

124. Thus, myrha, mastiche, camphora, sarcocolla, terebinthina, resina, pix, gummi sunt arborum certarum: quin et succinum (electrum,

glessum), ut ferunt.

XII. DE HERBIS TAM
HORTENSIBUS, QUAM
SILVESTREBVS
(ERRATICIS).

125. Herba excrescens
cauli vel scapo innititur.

126. Rapum, napus, siser
(sisarum), raphanus major,
raphanus minor, pastinaca,
brassica (crambe), lactuca,
asparagus, scolymus
(carduus altilis), apium
(petroselinum), nasturtium,
intybus sativus,
spinachium (spinachia),
bulbus edulis, portulaca,
atriplex, olera (oluscula)
vocantur.

127. Fruges sunt quae in
culmum (calamum)
surgunt et spicas (sive
aristatas sive muticas)
ferunt: glumis autem
granum fovent, aristis
praemuniunt, ut oryza, zea
(ador, far), milium,
panicum, frumentum
Saracenicum, frumentum
Indicum.

128. Legumina vero siliquis et valvulis implexa sunt, ut in faba, piso, ervo, cicere, lupinis, vicia, lente, phaseolis (smilacibus), videre est.

129. Sed qui fit, ut triticum (siligo) in secale, imo in zizania (aeram) et lolium; hordeum in aegilopem; avena in avenam fatuam degeneret?

130. Farrago et alicastrum pecoris causa seritur.

131. Bulbosa (bulbis turgidula) sunt allium, cepa, colchicum, porrum (us), scilla (squilla), hyacinthus, martagum.

132. Aromata sunt piper, zingiber, zedoaria (zadura), cinnamonum (cassia), nux myristica, macer (macir, vulgo macis), caryophilla, acorum, coriandrum, cubebae, anisum, anethum, cuminum (carum), sinapi.

133. Odoriferae et coronariae, e quibus corollas,serta, et servias vient ac plectunt, sunt amaranthus, caryophyllus, digitalis, rosmarinus, tulipae, lilia, viola, primula veris (verbasculum).

134. Gramini aggregantur, muscus, carex, polygonum, trifolium, cytissus, plantago, millefolium, convolvulus (smilax), consolida, erica, ruscus (ruscum), polygonatum, polygala, prunella, caltha, sonchus; et aquatiles, alga (ulva) ac lens palustris.

135. Aconitum, cicuta, napellus, venenatae sunt, ideoque radicitus

eruncandae.

136. Sed papaveris capitulum vulneratum distillat opium, quod vim habet soporandi et stupefaciendi.

137. MEDICINALES HERBAE: tam hortenses, quam campestres.

- Cephalicae.

Calidae et siccae: betonica, paeonia, amaracus (sampsuchum), salvia, rosmarinus (libanotis coronaria), spica (spica nardi), origanum, herba paralysis (primula), splenium, stoechas Arabica, flores tiliae, viscus quercinus (quernus), serpyllum.

Frigidae et humidae: flores nymphae clavae Herculis) sempervivum, mandragora.

- Ophthalmicae.

Foeniculum, euphrasia, chelidonia (hirundinaria).

- Thoracicae tam anacatharticae, quam bechicae.

Calidae: scabiosa, pulmonaria, hyssopus,

capillus Veneris, tussilago,
calamintha, glycyrrhiza,
helenium, iris, laserpitium,
petasitis.

Frigidae: malva, papaver
album, psyllium (pulicaria),
jujubae, sebesten, hordeum.

- Cardiacae.

Calidae: flores tres
cordiales, 1. chamaemeli, 2.
meliloti, 3. anethi; ocimum,
cariophylli* hortenses,
flores calendulae, trissago,
veronica.

Frigidae: flores cordiales
frigidi: violarum, rosarum,
buglossae, boraginis,
plantago.

- Stomachicae [et]
Pepticae.

Calidae: absinthium,
galanga, calamus
aromaticus, zinziber,
zadura, piperitis, semen 1.
carvi, 2. anisi, 3. cumini,
arum, nardus, geum
(benedicta).

Frigidae: acetosa (oxalis),
acetossela, ribes, berberis,
fraga, sonchus.

• Hepaticae.
Calidae: apium, agrimonia (eupatorium), cuscuta, hepatica, schoenanthum, spica (spica nardi), ageratum.
• Spleneticae.
Calidae: asplenum (scolopendrium, ceterach), fumaria, centaurium, chamaedrys, chamaepitys, aristolochia, tamariscus (myrica).
• Scorbuticae.
Nasturtium aquaticum, cochlearia, anagallis aquatica.
• Nephriticae et Cysticae.
Calidae: adjantum, ruta, ononis (arista bovis), paronychia, ligusticum, foeniculum, eryngium, petroselinum, urtica, daucus, lithospermum, miliun Solis, eruca, ruscus, filipendula.
Frigida: parietaria (helxine), etc.
• Uterinae (Hysterica).

Calidae: artemisia, pulegium, parthenium (matricaria), satureia, valeriana, smyrnium , angelica, melissa.
Frigidae: scariola. His aliae addantur ex botanicis.
• Attractivae.
Ranunculus, anemone (pulsatilla), cyclaminus, dracunculus, narcissus, nasturtium, helleborus.
• Repellentes.
Tribulus aquaticus, polygonum, auricula muris, pentaphyllum.
• Astringentes.
Bursa pastoris, stratiotes, anserina (agrimonia silvestris), umbilicus Veneris, sedum majus, sanguinaria.
• Laxantes.
Atriplex, violaria, centaurium minus.
• Obstructiones tollentes.
Tanacetum, betonica, aquilegia.
• Dolorem sedantes.
Verbascum, verbasculum.
• Somnum conciliantes.
Hyosyamus, semen papaveris, lactuca.

• Vulnerariae.
Pilosella (auricula muris), verbena, herniaria, sanicula, symphytum.
• Semen generantes.
Satyrium, strobilus, cinara.
• Corrodentes.
Vermicularis.
• Indurantes.
Lenticula palustris, echium, bistorta (serpentina) dracontium.
• Emollientes.
Senecio, anagallis.
• Rarefacientes.
Foenum Graecum, silicia (buceras), Mercurialis.
• Incrassantes.
Amarantus, lagopus, lapathum, cynoglossum, dipsacus, lunaria.
• Vesicantes (vesicatoriae).
Hydropiper.
• Urinam cientes.
Pepones, halicabum, acanthus, carum.
• Menses moventes.

Nepetha, teucrium, primula veris.
• Secundinas et foetum mortuum pellentes.
Thlaspis, sabina.
• Calculum frangentes.
Lappa, ononis (remora aratri).
• Sternutatoriae.
Nigella, ptarmica.
• Rheumatagogae et Masticatoriae.
Staphisagria, pyrethrum, mastix (mastiche).
• Errhina.
Succus betae, pulvis tabaci, etc.
• Vermes necantes et depellentes.
Corallium, menthastrum, filix saxatilis et arborea, chamaeleon albus et niger, persicaria, thalictrum.
• Alexipharmacae.
Coronopus (serpentina), anagallis mas, nerion, vincetoxicum (hirundinaria), eupatorium.
• Anodinae.
Solanum, opium.
• Magneticae.
Perforata (hypericum),

filix silvestris, personaria
(personata), succisa
(morsus diaboli).

- Vomitoria (Emetica).

Asarum, semen raphani,
et genistae, vitriolum
album in aqua communi
solutum, percolatum,
beneficio evaporationis in
cella ad tertias in crystallos
redactum.

- Bilem purgantia
(cholagoga).

Mitiora: cassia, tamarindi,
manna, myrobalani, aloë,
psyllium, rhabarbarum,
terebinthina, androsaemon.

Fortiora: scammonium,
asarum, peplium.

- Pituitam
(Phlegmagoga).

Mitiora: agaricus,
mechoacana, ialappa.

Fortiora: turbith
(turbithum), carthamus,
colocynthis,
hermodactylus,
euphorbium, opopanax,
sagapenum, sarcocolla.

- Melancholiam
(Melanagoga).

Mitiora: polypodium,

epithymum, senna.
Fortiora: lapis Armenius, lazuli, helleborus niger.
• Serum (Hydragoga).
Mitiora: ebulus, sambucus.
Fortiora: soldanella, tithymallus, elaterium, mezereum, gratiola, thymelaea.
• Diaphoretica.
Carduus benedictus, cornu cervi, terra sigillata, bolus Armenius; et quatuor exotica: china, sassaparilla, sassafras, guajacum.
XIII. DE FRUTICIBUS.
138. Sambucus, ribes, rubus, rubus idaeus, hederæ, ligustrum, glycyrrhiza, balsamum, paliurus, spina (sentis, vepres, veprecula), cynosbatum, vepreta, et dumeta, frutices cluent: et ubi illi ubertim progerminant, fruticeta fiunt.
139. Cannæ (arundines) internodia habentes, et junci, palustria amant, iisque laetissime proveniunt.
140. Ex scirpo enodi

(unde typhae enascuntur)
succiso, mattae (storeae,
tegetes) conficiuntur.

141. Boleti et tubera, inter
fungos praestantissimi, ac
quorundam lauticiae sunt.

XIV. DE ANIMALIBUS: ET PRIMO DE AVIBUS.

142. Quicquid vita, sensu
et motu praeditum est,
animal est.

143. Nam alites volant:
quaedam praepete ac
concitato, quaedam
languidiori volatu aërem
quasi sulcantes. Aquatilia
natant (nant), illae pennis et
alis, haec pinnis.
Quadrupedia currunt;
reptilia repunt.

144. Volucres sunt
bipedes (manucodiatam
enim esse apodem, falso
proditum est), et plumatae
et rostratae, excepto
vespertilione, qui pilosus et
dentatus.

145. Rostro legentes
grana, ingluviem
referciunt: nulla mingit.

146. Procreationis causa nidos struunt (nidificant, nidulantur): halcyon (halcedo) in ipso pelago inusitata eius tranquillitate, unde halcyonia.

147. Tum pariunt ova (quae sub testa albumen, et vitellum, seu luteum occultant): iisque donec animentur incubantes (si subventanea (zephyria) aut urina non fuerint) pullos implumes excludunt: qui dum pipiunt, pipiones vocantur.

148. Rapaces sunt vultur, milvus, accipiter, falco, nisus, quae unguibus uncis in turtures aliasque innocuas alites saeviunt, captasque incunctanter ac crudeliter dilaniant.

149. Noctua noctu cernit, interdiu caecutit: ut et aliae nocturnae, bubo, asio, scops, ulula, strix, caprimulgus, nycticorax.

150. Phasiani, otides (tardae), tetraones (urogalli)m meleagrides (gallopavones), capones, atagenes, perdies, coturnices in deliciis habentur: et ornithotrophiiis inclusae opipare optimantur.

151. Olor (cygnus), fulica, mergus, querquedula, onocrotalus, pelecanus, et aliae aquaticae, palmipedes sunt: nulla pennipes.

152. Sturni gregatim (unde sturnatim) sed absque ordine, grues valde congrue, ardeae admodum excelse volitant.

153. Canorae sunt: acanthis (carduelis) alauda (galerita), acredula (luscinia, philomela), fringilla, galbulus, merula, linaria.

154. Palumbes, et livia sunt columbae ferae. Locus in quo columbae cicures educantur peristeron (peristerotrophium, columbarium) vocitatur.

155. Merops, upupa, picus, ficedula, rubecula (erythacus), [et] curruca vermibus vescuntur: ut et gavia fortassis, sed magis est ut pisciculis.

156. Trochilus et parvus parus perredicule se struthioni (struthiocamelo) compararent.

157. Turdus sibi ipsi cacat exitium: quia quod conspuat, ex eo viscus (viscum) pullulat: unde viscus (viscum), id est, aviarium gluten.

158. Coturnix curtam habet caudam, motacilla suam indefesse motat: pavo suam ocellatam et variegatam (varie pictam) dispendens superbit.

159. Cassita (galerita)
cirrum, gallus cucuriens
cristam in suo sterquilinio
erigit.

160. Anser, quem
turundis saginant, strepit
(gingrit, gratitat), anas
tetrinnit, gallina gracillat et
glocitat (glocit), corvus
crocitat, aquila clangit,
ciconia crepitat, cuculus
cuculat, noctua cucubat,
pica garri, monedula
(graculus) fringultat,
cornices cornicantur,
hirundo trinsat, passer
fritinnit aut minurit.

161. Caeterum psittacus
articulatas voces formare
suescit.

162. Phoenicem,
gryphem, [et] harpyias
figmenta esse puto.

XV. DE AQUATILIBUS.

163. Pisces lympham ore
immissam branchiis
emittunt.

164. Suntque squamosi

vel glabri, et horum alii
vivipari alii ovipari.

165. In illis mares habent
lactes, foeminae ova.

166. Fluviatiles sunt:
stureo (acipenser)
antacaeus exos (huso),
amia, anguilla lubrica
(quam si capessis, elabitur),
mugil (capito), mullus
(barbus), trutta, aurata,
thymallus, alburnus
(leuciscus), hobius
(fundulus), mustela, cobitis
barbatula (apua), cobitis
aculeata, rutilus (rubellio).

167. Piscinales, carpio
(cyprinus), lucius (lupus),
coranicus, perca, tinca,
oculata (melanurus).

168. Marini seu pelagici
aci, salmones (esoces),
muraenae, muraenulae
(flutae), alosae, congri,
rajae, ostreae, rhombi
(passeres), soleae, mytuli
(pectunculi), sardae
(sardinae), scombri,
spirinchi (saperdae),
squillae, et varia monstra,
ut hippopotamus, phoca,
etc.

169. Haleces salitas in

tinis, quae ex tabulis
(assibus) dolatis fabricantur
(fabrefiunt), nobis afferunt:
passas vero, ut et sole
tostos passeress in fasciculis.

170. Asellus arefactus, nisi
probe contusus, esui non
est. De passere majore
carnosas habere licet partes
siccatas.

171. Delphinus
pernicitate, balaena (cetus)
magnitudine omnibus
anteit.

172. Cancer et cammarus
(astarus), cum suis chelis
antrorsum et retrorsum
reptant.

173. De muricis
(conchylii) ostro purpura
conficitur, ipsi animalculo
cognominis.

XVI. DE JUMENTIS.

174. Jumenta sunt
animalia domestica nos
juvantia.

175. Gibbosus enim
camelus vehiculi vicem
praebet, rebus ponderosis
alio deportandis.

176. Equus juba insignis,
indole atque ingenta
nobilitate ferox. Domatur

tamen et fraenatur injectio
etiam lupato, quanquam
interdum poppysmis
demulceatur ut sessori
obtemperet.

177. Sed nihilominus
quandoque efferatur
(praesertim effraenis),
eumque dejicit (pessumdat)
aut calcitrando ferit.

178. Cantherius factus,
hinnire ac ferocire desinit.

179. Dum pullus est,
ungulis eius soleae non
applicantur.

180. Pandus asinus
(asellus) vulgo calceatur.
Idem ab agasone ob
tarditatem fuste dedolatus
rudit.

181. Taurus cum paleari
pendulo boat et mugit,
ferocius tamen in
admissura. Agnus balat.

182. Vervex est aries cui
virilitas adempta est:
vexatus arietat.

183. Caper est castratus hircus. Haedo, etsi petulanti et petulco, nondum est aruncus.

184. Porcus grunnit, et non ruminat, utut bisulcus: lotus ad volutabrum recurrit: non castratus dicitur verres: exsectus sus, maialis.

185. Porcelli (a lacte depulsi, nefrendes dicti), sumen scrofae, capellae rumas distentas caprae altricis sugunt.

186. Canis sive villaticus sit, sive catenarius, sive pecuarius cum catulis adlatrat advenam, propinquantem mordet clanculum.

187. Si irrites, diducto rictu ringitur: si percutias, quiritatur, alioqui baubatur.

188. Rabie correptus (rabiosus) discurrit passim, et in quod irruit, laniat:

morsuque hydrophobum
reddit.

XVII. DE FERIS.

189. In amoenis
nemoribus, aut floridis
silvarum saltibus, aut
frondentibus virgultis
pastae fere ad sua lustra et
latebras (speleae) se
recipiunt.

190. Elephas (elephantus),
belluarum maxima
barriens, crura quidem
obscurius flectit,
procumbens tamen
interquiescit, et pabulum
proboscide (promuscide)
convolutum attrahit.

191. Monoceros
(unicornu, unicornis)
abditissima deserta,
inhospitaque tesqua incolit.

192. Rhinocerus (os)
osseis squamis indutus est,
et cum barris validissimis
proeliatur.

193. Alcis tergus si caesim
secare attentes, est
impenetrabile.

194. Villosus ursus

murmurat et uncat,
quodque progenuit
circumlambendo, si
credimus, effingit.

195. Pardus et pardalis
(panther, panthera), quod
terno saltu non
prehendunt, mittunt.

196. Tigris velocitate et
ferocitate omnes superat.

197. Lynx maculosa visu
pollet: unde lyncei
appellationem traxere.

198. Cervum (qui rancet)
cornua non gravant,
quamvis grandia: agilis est,
et longissimi aevi.

199. Non absimilis huic
dama, sed minor: item
caprea (dorcus), masculus
hujus hinnulus est.

200. Capricornus et ibex
praeruptas rupes scandunt,
indeque desiliunt
indemnes.

201. Bubalus (bison) et
urus feri boves sunt.

202. Leo armis hirtis,
formidolose rugit.

203. Vulpes ineunte vere
glabrescens fit depilis
(alopeciam patitur); gannit,

et difficile cicuratur.

204. Lepore nihil timidius (meticulosius): quicquid strepit, territatus aures arrigit aut se proripit confugitque ad dumeta: dum capitur, vagit.

205. Cuniculus fodicando cuniculos, talpa grumos facit.

206. Herinacio (echino) et hispidae histrici aculei sunt pro pilis.

207. Simia (us) perquam proterva est, et operum nostrorum imitatrix, ut et cercopithecus.

208. Glire et mele nihil somnolentius, et hinc pinguescere etiam dicuntur.

209. Viverra, mustela, martes, martes (mustela) Scythica, mustela Alpina (mus Ponticus), mus Alpinus, mus Noricus, pelliceis conveniunt.

210. Sciuri, sorices, criceti, etc. foramina sibi cavant, in quibus velut hybernaculis quibusdam hybernant.

211. Sed murem (murem majorem, murem araneum) penuaria perreptasse argumento sunt muscerda et arrosa cibaria: hi catis (felibus) aut muscipulis subinde praeda fiunt.

XVIII. DE AMPHIBIIS ET REPTILIBUS.

212. Amphibia sunt castor (fiber), ex cujus folliculis non incelebre medicamen castoreum exscinditur, lutra, rana coaxans, testudo, bufo, rubeta, et crocodilus, qui inter manducandum maxillam (mandibulam) superiorem movet, etc.

213. Reptilia (serpentina) sunt, quae serpunt exuviasque deponunt, ut sibilans anguis (coluber), hydra (natrix), aspis, situla

(dipsas, praester), ptyas, vipera (excetra), caecilia, boa* (1642, no Gr. equiv.), cerastes jaculus, amphisbaena, etc.

214. Draco ipso halitu, basiliscus obtutu necat.

215. Lacerta, seps, stellio, salamandra, scorpio (scorpius) pedibus ambulant.

216. Limaces sunt cochleae sine testis, quas hae veluti domunculas portatiles quoquo arrepunt circumferunt.

XIX. DE INSECTIS.

217. Insecta sunt varii vermes, ut asellus (millepeda), scolopendra, tipula, etc.: e quibus lumbrici fimeta, erucae (bruchi) plantas, teredines [et] cossi (cosses) ligna, tarmites (termites) carnes, tineae vestes (etiam bombycinas et holosericas), blattae libros, convolvuli (volvoces) vites; gurguliones (curculiones) frumenta corrodunt.

218. Lendes, pediculi,

pulices, culices, cimices,
acari nos ipsos infestant:
quin et ricini et hirundines
(sanguisugae), praesertim
si quid denudemus.

219. Bombyces sericum,
apes bombilantes favos
mellis (quos fuci
depascunt) conficiunt, non
sibi sed nobis mellificantes;
et quotannis examen, ut
novam coloniam emittunt.

220. Crabrones et vespae
praeacuto sunt aculeo, quo
etiam membranacea quaeque
integumenta perterebrant.

221. Oestro (tabano, asilo)
percitum pecus subsilit et
velut rabidum discursitat.

222. Scarabaeorum et
locustarum genera
complura sunt, quaedam
edulia.

223. Canthari,
cantharidesque,
cantharides rubeae,
scarabaei cornuti,
papiliones et cicindelae
(lampyrides, nitedulae) et
hepioli (pyraustae),
muliones, etc. volatiles
sunt.

224. Cicada foris, gryllus
domi cantillant.

225. Formica pusilla est,
sed actiuosa: semper
festucas et micas fert.

226. Aranea (araneus)
araneum nexat, idque etiam
inauratis lacunaribus
annectit.

XX. DE HOMINE.

227. Princeps animantium
homo (microcosmus
philosophis, quippe
macrocosmi epitome)
vagiens nascitur.

228. Quem genetrix aut
obstetrix fasciis involutum
in cunas (quas rursum
prorsum motat) reponit.

229. Nutrix vero alma
amplectens (amplexans)
alumnum suum in sinu
reclinem uberibus lactat aut
pappis satiat, tum etiam
sordidatum abstergit. Pusio
ipse lactet.

230. A cunabulis venit
ad serperastra, ubi infans
bimulus incessum sibi
format, et fari ac balbutire
incipit: crepitaculis, pupis
et crepundiis ludens.

231. Impuberes cum
pubescunt, sonoram vocem
mutant, hircuitalliuntque.

232. Ephebi dicuntur
adolescentes; mox puberes
et adulti, juvenes.

233. Ab infanti et puerili
aetate, virilis vergit ad
provectam: senilis rugas et
canos affert.

234. Vetula annosa (annis
vergens) edentula fit:
Senecio capularis
(de pontanus, silicernius),
incurvus ac decrepitus est.

235. Ita infantia seipsam
ignorat. Pueritia ludicris
transigitur, juvenus vanis,
virilitas laboriosis. Senectus
ad priora relabitur.

236. Senes enim bis pueri:
et iidem quo magis
senescunt grandaevi, eo
plus repuerascunt ut
plurimum.

237. Mediocri (media,
medioxima) statura homo,
optimae est proportionis.

238. Nam gigas terriculo
est, nanus (pumilus,
pumilio) deridiculo: ut
enim illum tanquam
insuetum terriculamentum
aversamur, ita hunc velut
abortivum pygmaeum
deridemus atque illudimus.

239. Hirsutos quosdam in
solitudinibus obvagari,
decantatum magis quam
compertum est, cum
hirsutia belluina videatur.

240. Fauni enim et satyri,
si commenta non sunt,
daemonia fuerunt.

XXI. DE CORPORE ET PRIMUM DE MEMBRIS.

241. Corporis nostri
compages ex ossibus,

cartilaginibus, tendinibus,
nervis, carne, musculis,
cute triplici, et membranis
(involucris) variis
coagmentata et consolidata,
expressissimum omniscii
exstructoris velut
signaculum est.

242. Membra cohaerent
nexibus perpetuis, in
proportione decentissima.

243. Nam quae bina sunt,
ex opposito sibi ad latera
locantur; quae singula, in
medio.

244. In vultuum
lineamentis stupenda est
varietas.

245. Frons angusta,
asinina est: lata, bonae
indolis; rugosa, animi
anxii; caperata (adducta,
friata) iracundi ac tristis;
erugata et exporrecta,
gestientis nota.

246. Pupilla oculi albugini
haerens, perspecillum
eminulum est, objectarum
rerum imagines

transmittens, non autem
speculum reperiens:
quae translapsae, in
retiformi tunica sese
depingunt.

247. Hanc palpebrae
nictando humectant; cilia
vero et supercilia
communiunt.

248. Sed hirci lacrymas
et lemas sudant. Cranium
autem tribus commissuris
(coronali, sagittali),
interstringitur. Hoc
pericranium, seu nervosa
membranula ex meninge
exteriori (dura matre),
pronascens, succingit.

249. Inter tempora, et
nasum (quem alii simum,
alii resimum, alii aquilinum
(aduncum) habent) sunt
genae, iisque subsunt
malae.

250. Per nares, ut cloacam,
mucus demanat, quem
vibrissae detinent, ne
exsudet nisi mungantur.

251. Ut adolescens investis est, ita juvenile mentum lanugine, virile barba, labrum autem superius mystace tegitur. Quidam tamen etiamsi consenuerunt (ad extimum usque senium) imberbes sunt.

252. Anterior colli pars, jugulum est (quod in jugulatione praeciditur), posterior cervix.

253. Thorax (pectus) mammis et papillis turgidus, inferne ventrem habet, ad partes latera.

254. Costae, ab axilla coeptae, in hypochondria desinunt.

255. In inguine verenda (pudenda) sunt, circumspecte obvelanda. Ea enim qui nudat, inverecondus atque effrons est.

256. Infra coxas femora (femina) sunt, sub genubus tibiae, sub poplite inferius surae.

257. A suffragine planta

pedis est, talos (calcem, calcaneum), convexum plantae, et solum, cumque digitis hallucem, continens.

258. Tergum superne habet scapulas, inferne lumbos, subsequenter culum (podicem), sessionis gratia natibus (clunibus) circumvolutum.

259. Spina dorsi totius structurae (fabricae) fultura, triginta quatuor vertebrae (verticulis) contiguas constituitur, ut incurvari queamus.

260. Manus in se lacertosum (torosum) brachium continet, lacertum, cubitum, volam: quae diducta palma est, contracta pugnus.

261. Digi sunt quinque, singuli articulos tres, et totidem artuum juncturas condylosque habentes.

262. Pollice premimus, indice monstramus, verpus (medius) prominet: inter quem et minimum (auricularem) annularis est.

263. Unguibus scabimus (scalpimus), laceramus (lancinamus).

264. Sinistra (laeva) tenet, dextra operatur: omnia

apte, nisi quis ipse ineptus
aut iners.

265. Sed ambidexter prae
scaevoa seu scaevola
multum habet: et hic prae
manco.

XXII. DE MEMBRIS INTERNIS.

266. Eia, jam viscera (exta)
inspiciamus.

267. Alimentum dentibus
primoribus incisum,
molaribusque commolitur
(concisum) manditur
(bucca enim molendinum
est), mansumque per gulam
(oesophagum)
(quadrupedibus primo ad
rumen, tum ad omasum,
post ad pantices,
dumque ventriculum
sive echinum) ad
stomachum demittitur
(devolvitur): ubi fit
concoctio prima, confectio
chyli, seu conversio
esulentorum in liquorem
cremori ptisanae similem.

268. Nam venae
mesaraïcae chylum
exsugunt, eumque
excrementis crassioribus
per intestina tam gracilia
(duodenum, jejunum, ileon)
quam crassiuscula (caecum,
rectum et anum) foras

egestis, quae stercora (merdae, oleta) sunt deferunt ad jecur: ubi denuo fit separatio, sanguinis confectio (dicta χῶμυσις).

269. Serosum per ureteres meat ad renes, indeque vesicae instillantur, et fit urinae (lotium), quae meiando emittitur.

270. Pinguior pars ab hepate rubedinem accipit, et fit sanguis, qui per venas (scilicet portam, cavam) distribuitur.

271. Lien (splen) interim, ut organon melancholico humori proprie dicatum, pertrahit ad se et rursum ejicit melancholiam, vesica fellis bilem (choleram).

272. Pituita (phlegma) per omnia diffluit atque ad intima pervadit.

273. Cor, in pectore situm, primum est vivens et ultimum moriens, utpote vivacissimi caloris.

274. Eo enim continenter bulliens, sine requie quoque palpitat, quemque progenerat vitalem spiritum per arterias quaquaversum didit.

275. Refrigeratur ab adjacente pulmone respirando per arteriam asperam: qua laesa, raucedo et tussis fit, ut et a

clamore immoderato.

276. Praecordia haec ab inferiore ventre septo transverso (seu diaphragmate) disjunguntur.

277. Omentum vero ilia, ut mesenterium lactes, obvolvitur.

XXIII. DE ACCIDENTIBUS CORPORIS.

278. Secundum externam speciem quidam sunt corpulenti, obesi et habitiores, alii graciles, macilenti, et frigosi; quidam formosi, alii deformes et turpes.

279. Secundum habitudinem internam, vegeti aut morbos, robusti aut infirmi atque teneri.

280. Crispi non facile calvescunt, rufi difficulter canescunt.

281. Cilones in phrenesin proclives sunt; et si phrenetici fiant, vacerrae includuntur.

282. Praestat (nimio satius est) luscum esse quam caecum (visu orbem), surdastrum quam surdum, haesitantem quam balbum, blaesum quam mutum, claudum quam intortum, luxatum quam mutilatum.

283. Strabo distorte, paetus oblique contuetur. Cocles unoculus est, myops ad dissita luscitiosus.

284. Silones, nasuti acriter odorari; buccones ingluviosi; flacci et jugulis non cavis, bardi, et blitei esse putantur.

285. Verruca, struma, gibbus (gibber), et quodvis

tuber deformant.

286. Similiter et naevi, lentigo (vitiligo), porrigo, petigo (impetigo), mentagra (mentigo), lichen, varix, et omnis macula deturpat.

287. Item, si quis tetanicus sit, aut obstipus incedat, vel cernuus.

288. Calvi aut calvastri sunt, aut recalvi. Horum nonnulli calvitium (calvitiem) sibi decori reputant, alii dedecori ac dehonestamento.

289. Claudicatio a luxatione est: intertrio* ab attritu, et cum primis ex equitatione: reduvia* a phlegmone turgente.

290. Vari sunt, quales bifurcati bacilli; valgi, quales cancrini cirri; vatiae (**vatii, LSJ), qualia attelaborum cruscula. Loripedes autem, compernes, scauri, pansae, prave quidem omnes ingrediuntur, non tamen claudicant.

291. Spado est, cui testiculi (colei) ablati sunt: apella, cui pellicula glandem contegens.

XXIV. DE MORBIS.

292. Ventriculus (a quo aegritudinum origo) inanis esurit, et sitit, oppletus singultit et ructat, crudus escam fastidit.

293. Pallor cachexiam, hoc est valetudinem debilem et incommodam; torpor ac veternus (lethargus), enervatam arguunt.

294. Morborum alii dolorem, alii stuporem, alii pruritum duntaxat, alii convulsiones inducunt; sed recidivi et enervant magis, et plerumque extinguunt. In eis notanda sunt symptomata, crisis, integritas (cessatio a paroxismo), et status (vigor) qui vehementiam habet. Horror est perfrictione major, et rigore minor.

295. Decumbentes, si non plene convalescunt, fiunt valetudinarii: et quod pejus, clinici.

296. Hoc solatio est morbidis: qui multum doluit, dedoluit.

297. Cephalalgia et cephalaea magis inveteratum malum, potissimum si calvaria solidum os fit, aut vertiginem aut delirium aut furorem (maniam) causatur.

298. Odontalgia fit cum parvuli dentiunt aut cum gingivae putrescunt.

299. Lippitudo est caecitatis praeparatio: nec creber aurium tinnitus bonum portendit. Purgabis eas saepiuscule auriscalpio et minus obsurdescent.

300. Gravedo (rheuma) est catarrhi destillatio; asthma, respirationis difficultas.

301. Angina (inflammatio

uvulam et tonsillas angens)
ne fauces strangulet, guttur
gargariza.

302. Languores et deliquia
animi aceto (quod in
acetabulis praesentatur)
reficiuntur.

303. Diarrhoea, lienteria,
et dysenteria effluvio
molesta sunt. Tenasmus
excernendi conatus sine
effectu est.

304. Stranguria, cum
micturientes stillatim
meiunt, calculi
primordium.

305. Tormina (vermina),
passio iliaca, et dolor
colicus miserrime affligunt.

306. Pleuritis et lumbago
minus cruciant, icterus nihil
fere.

307. Tumor extumescit et desidit. Non sic hernia (ramex) et therioma, quae tenacissime perdurant.

308. Toxicum (venenum) qui assumpsit, turgescit; sed ei resistit theriaca.

309. Arthritis artuum juncturas (ex interfluxu humoris viscidii) divexat: quae in manibus peculiariter chiragra, in genibus gonagra, in pedibus (qui et pernionibus acerbissime affliguntur) podagra, in coxandicibus ischias dicitur.

310. Februm querquerarum ephemera est diaria; quotidiana quotidie, tertiana alterno die redit.

311. Quartana, hydrops, phthisis morbi diuturni, sontici, et lethales sunt: illa aegrotationis diuturnitate enecat, iste intercute aqua perimit, haec lenta tabe (pulmonum exulceratione)

consumit et exitium consummat.

312. Ecstasi aut epilepsia laborantes a morbo caduco (comitali, Herculeo, sacro) parumper absunt.

313. Paralyseos, hemiplexiae, apoplexiae (siderationis) praecursorem perhibent esse spasmus. Melancholia, cardialgia, atrophia, peripneumonia haud omnino infrequentes, non tamen facile sanabiles sunt. Erysipelas quidem prae ardore rutilat, ei tamen facilius medicamur. Hircus est alarum (axillarum) virus.

314. Pestis (pestilentia), bubones et carbunculos (anthraces) jaculans, repente (subito) invalescit, ingentesque nationes suo contagio (contagione) vastats funestatque.

XXV. DE ULCERIBUS ET VULNERIBUS.

315. Suppurans ulcus, ubi

abscessit, apostema (abscessus) dicitur; dum rumpitur, pus, tabum (sanies) ex eo profluit: e pure autem cum carne convoluto et concreto fit glandula.

316. Carcinoma (cancer, phagedaena), herpes, gangraena, venerea lues, lepra, vari (exanthemata, boae), papulae, pustulae, more scabiei pruriginem proritant et contactu inficiunt, ideoque contagiosi sunt. Quibus affinis fere est stomacace (scorbutus).

317. Vulnus caesim fit aut punctim, plaga percussione aut contusione: cujus signum livor est.

318. Illud, si neglectim habitum recrudescat, fit purulentum, magisque exulcerat.

319. Quum vomica coit, crustā obducitur, tandem tamen cicatrix superat.

320. Vibices a verbere sunt, pustulae ab adustione, callus ab induratione.

XXVI. DE SENSIBUS EXTERNIS.

321. Caleat an frigeat quid tangendo; humidum an siccum sit, prensando; durum an molle, comprimendo; lene an asperum, attrectando; grave an leve, tollendo periculum fac, comperies.

322. Palpando quaerimus, quod non conspicamur.

323. Atque iste est primus sensus, tactus: quem extima quaeque corporis maxime participant.

324. Gustus (quo simios praepollere volunt) dignoscit sapores.

325. Quomodo quid sapiat, scire vis? Gusta: sed palato haud exsurdato.

326. Saccharum dulce est, absinthium amarum, acetosa acida, piper acre, labrusca acerba, immatura (immitia) mala austera: quaedam plane insipida.

327. Odoratus (quo venaticae caniculae excellunt) odores, qualiter

quid oleat, olfactando
internoscit.

328. Moschus et zibethum
(qui cruor est, circa
umbilicum felis zibethi
collectus) fragrantiam
exhalat, assa vel adusta
caro nidorem, morticina
foetorem (paedorem).

329. Mucida et situ
corrupta, putida; putrida,
rancida (cujusmodi lardum
esse solet et arvina)
sordent, ac foetent.

330. Auditum (quo bene
auriti alios antecellunt)
tones discernimus.

331. Contrarii sunt: risus
et fletus, cachinnus et
ejulatus, plausus et
planctus, jubilum et
gemitus atque suspiria,
susurrus et vociferatio.

332. Sonus percussus et
resonans, echo dicitur. Ex
collisione (compulsu),
stridor aut crepitus; et si
vehementior fit, fremitus
(fremor), nullus (cum
nempe conticemus)
silentium. Puerulorum
autem ploratus vagitus
vocatur.

333. Aspectu colores
(quorum albus et niger
extremi, reliqui intermedii
sunt) discriminamus.

334. Nigrioris autem

gradus sunt: atrum ut pix,
fuscum (furvum) ut
Aethiops, pullum ut passer,
aquilum ut anser,
spadiceum (badium) ut
castanea.

335. Inter caerulea:
caryophyllon dic
hyacinthinum, violam
janthinam, sugillationem
lividam, cyanum cyaneum,
felinos oculos caesios
(glaucos).

336. Inter viridia:
quercetum herbeum,
pinetum prasinum, pontum
hyalinum (vitreum),
eumque undantem
(aestuantem) venetum
(cymatilem).

337. Rubra sunt: leaena
(lea) fulva, vulpecula rufa,
minium puniceum, flamma
rutila.

338. Lutea sunt:
auripigmentum flavum,
cadaver exsanguie luridum,
lupa rava, ceromata cerea,
later semicoctus gilvus
(helvus).

339. Sub albedine sunt:
russus, cinereus, pallidus,
lacteus, canus, candidus,
niveus, vulgo noti. Sed
quaedam sunt discolora
(versicolora), decolora.

XXVII. DE SENSIBUS INTERNIS.

340. Ut sentire te sentias, interni sensus dati sunt tres, qui in cerebro (quod sternutando purificatur) resident.

341. Nimirum sub sincipite sensus communis, qui rei visae, auditaе, gustatae etiam simulacrum apprehendit.

342. Hic in somno a vaporibus obstruitur: unde insensilitas (insensibilitas).

343. Sub vertice habitat phantasia, quae discrimina rerum dijudicat.

344. Haec in perpetue est agitatione: hinc cogitationes, somnia (insomnia), et multifariae imaginationes (phantasmata).

345. Sub occipitio memoria est, quae apprehensa et dijudicata in futurum usum recondit.

346. Illas rerum icones (sive dudum sive nuper impressas) recogitare reminisci est.

347. Eae si oblitteratae sunt, oblivionem vocamus.

348. Quamobrem, quorum constanter meminisse volumus, eorum crebro recordamur.

349. Quod oblitus sum,
qui memor est mihi
memoret (commemoret).

350. Vigilia nimia hebetat
et fatigat quia cerebrum
exsiccat. Sopor relevat et
recreat quia irrigat.

351. Nec tam impense
inedia debilitat quam
insomnia. Insomnes enim
vigor omnis destituit,
comitante haud raro
insania.

352. Dormituriens oscitat
et pandiculatur; dormitans
capite nutat; dormiens
stertit (ronchissat).

XXVIII. DE MENTE.

353. Mens in rerum
disquisitione rationem
consulit, quia intellectu eas
comprehendere animus ei
est.

354. Cui egregium est
acumen, sagit et cito rem
perspicit; hebetes
tardiusculi sunt.

355. Qui multa inquit est
industrius; qui noscit,

gnarus; qui excogitat,
sollers; qui notitiam usu
firmavit, expertus; qui uti
novit, prudens; qui utitur,
sapiens; qui abutitur,
astutus et fraudulentus.

356. Contra, qui nihil
curat, torpidus est; qui nihil
percipit, stupidus; qui nihil
perpendit, improvidus.

357. Vera rei apprehensio
scientia est; falsa, error;
debilis, opinio; ex
conjecturis veniens,
suspicio; vacillans,
dubitatio, impedita,
hallucinatio (alucinatio);
nulla, ignoratio (inscitia).

358. Cum alterius
relationi credimus, fides,
persuasio, assensus.

359. Quorum causam et
rationem non intelligimus,
miramur (et hinc
miraculorum exortus).
Quae pernoscere volupe
est, rimamur: et hoc
diligentius quo abstrusiora
sunt.

XXIX. DE VOLUNTATE ET AFFECTIBUS.

360. Voluntatis est, bona amare et velle, mala odisse et nolle.

361. Ex accidenti est, si haec placent, illa displicent: tum enim species externa eam decipit, ut eligat deteriora aut spernat potiora.

362. Ecce autem quam subjecta est affectibus! Quibus identidem perturbatur.

363. Absunt bona? Desiderat ea, optat, bene ominatur, anhelat, conatur et molitur quicquid potest. Frustrationem nihilo secius veretur.

364. Hinc desideria, vota, spes, studia, molimina, sollicitudo.

365. Antequam adipiscitur, cum taedio fert etiam paulae morae intercapedinem.

366. Adsunt? Gestit aviditate, laetatur, gaudet, jubilat, oblectat se fruendo iis, amittere metuit. Inde hilaritas, laetitia (gaudium), jubilatio, voluptas, conjuncta tamen cum metu.

367. Eripiuntur? Tristatur, dolet, queritur, miseratur: hinc tristitia, poenitudo, querela, lamentatio.

368. Magis vero mala eam inquietant et distrahunt, praesertim si immerito a maleficis incutiantur.

369. Ventura enim abominatur, ac declinat; formidat tamen, tremit, et angitur: hinc aversatio, timor (formido), tremor, et anxietas.

370. Advenientia pavescit, horret, trepidat ad ea, vel stupescit: inde pavor, horror, trepidatio, et stupor.

371. Quum obvenerunt, irascitur, maeret, luget: hinc ira, maestitia (maestitudo), luctus.

372. Aliter fit in alienis bonis et malis.

373. Ibi gratulatur (gratatur) aut invidet, hic commiserescit aut (si perversa est) exsultat et insultat.

374. Boni ignorantia neglectum et aspernationem adfert (quis enim incognita unquam consecatur?); violatio, zelum; satietas, fastidium; turpitudine (siquidem ob malefacta erubescimus), pudorem.

375. Maioris levamen est, si cogites hospitari hic nos veluti fugitivos, nec praecipuos esse in angustiis, sed omnia omnibus accidere.

376. Post lapsum enim nihil in nobis integrum, sincerum: omnia mutila, manca, et obfuscata, uno verbo, misera.

XXX. DE MECHANICIS IN GENERE.

377. Hactenus naturalia. Artes mechanicae (manuariae) sunt, quibus victum et amictum acquirimus.

378. Jam ergo artificum quoque officinae cum ipsis opificiis visendae nobis erunt.

XXXI. DE HORTORUM CULTURA.

379. Hortus vel pomarium est, vel viridarium, vel vivarium.

380. Sepitur vel aggere vel macerie vel plancis (assamentis, tabulis) consertis ex asseribus sectilibus, vel sepe e palis (sudibus), longuriis, ac viminibus vitilibusque plexa; opere topiario ornatur.

381. Hortulanus (olitor) ligone et rutro, bipalioque (pastino) fodit et sarrit, et per pulvinos semina spargit.

382. Arborator seminario taleis, aut malleolaribus virgis (quas non amplius quam sex esse convenit) vel viviradicibus consito. (Concinnitas est et elegantia, si per quincuncem digestae pangantur.) Inspicatos surculos (clavolas) inserit et rigat, scalproque germina (pullulationes) putat (amputat), marra vel irpice (sirpice) vel runcina nocuos coliculos (stolones) excidit, luxuriamque exherbat

eradicatque.

383. Oleum ex olivis
aboleario exprimitur: dein
saepius decapulatur
(depletur) atque elutriatur.
Subtus amurca sedit, fraces
abjiciuntur, depurgatum
lecythis inditur.

384. Apiarius alvearia
curat ob mellificii
utilitatem, ceramque liquat
ac depurat.

XXXII. DE AGRICULTURA.

385. Agricola est qui
agrum colit, proventuque
annonae et pecunia ex
frugibus venditis redacta se
sustentat.

386. Cui fundi et praedia
meritoria locantur,
manceps et publicanus est;
qui si decuas (decimas)
quaestus sui gratia redimit,
decumanus; si portoria,
portitor; si pascua,
pascuarius dicitur. Cui villa
concreditur, villicus et
colonus est.

387. Arvum cespitibus
depurgatum et subactum,
ut sit fertilius
fecundiusque, ante
sementem stercoretur fimo
(laetamine) vel marga.

388. Novale (vervactum),
id est requietus ager,
feracior est restibili;
irriguus, montano et
collino; limosus, siccanneo.

389. Araturus jungit
aratro boves iugo, non
funiculis eos conjugans:
unde jugales tunc dicuntur.

390. Tum agitans et
stimulo incitans, subarat,
iterat, tertiat, seminat, et
pectine (rastros) occat, et
inaequat liras ac versuras.

391. Inter lirandum vero
altera manu tenet stivam ne
deliret, altera rallum.
Vomere autem buri inserto
proscindit sulcos donec
absolvatur iugerum.

392. Porca fit transversim
ad derivandam uliginem
per elices (colliquias).

393. Occam (urpices) in
argilloso solo ferream esse
oportet; in arenoso, lignea
satis est.

394. Ubi segetes
fruticescunt, ne a zizaniis
suffocentur fruges,
sarritione (runcatione) quae
sarculo fit opus est.

395. Cum messis appetit,
messores illis immituntur
falce acuta, qui maturas ac
flavescentes demetunt, hoc
alacriores quo excreverunt
uberiores, manipulatimque
disponunt, spicilegio
egentibus relicto.

396. Colligunt
postmodum merga in
mergites et colligant
tomicibus, superante in
campo stipula.

397. Tum vehibus in
horrea convehunt, vel
acervos congerunt
(acervant).

398. Tritores in area
flagellis triturant (olim
exterebant tribula);
linquuntur stramina et

acera.

399. Subjactant exinde ventilabro ut secernatur palea et quicquid inhaeret recrementi.

400. Si quid adhuc superest impuri, cribro cernunt (cribrant) ut fiat frumentum purum quod granariis insertur.

XXXIII. DE MOLITURA ET MOLILIBUS.

401. Antiquitus tundeabant frumentum solummodo pistillis in mortario: hinc Ptisana.

402. Deinde pinsebant pilo ruidō in pistrino: unde pultes, alica, et alia fressa.

403. Novissime a machinatoribus excogitatae sunt molae trusatiles primum, tum asinariae (jumentariae), tum aquariae et ventosae (alatae).

404. Ubi farina per

saccum cilicinum excutitur,
furfuribus foras sparsis.

405. Sed molitor dum
molit et similaginem cum
pulvisculo converrit,
emolumento suo inhiat.

XXXIV. DE PANIFICIO.

406. Pistor massam in
mactra, spatha lignea
depsit, et in furno excoquit.
Fermentatus panis duas
habet crustas, medullam
intus porosam; azymus
cum fine fermento
subigatur, densus est.

407. Cupedinarius ac
crustularius ex polline
cupedias apparant,
liguritorum in
comessionibus
pulpamenta.

408. Illis congeneres sunt
placenta atque in his
similae, spirae, crustula,
lagana, liba, dulcaria,

scriblitae (streblitae),
artocreatae, teganitae,
globuli, boletini, obeliae,
tractae.

XXXV. DE PECUARIA.

409. Opilio fistula, pera et
pedo, vel flagro (scutica)
instructus, ovium agmem
(in quo peculium, peculiari
charactere insignitum,
habet) agit, et pastum
educit.

410. Lupus, voracissima
bestia (qui famelicus
ululat), non greges solum,
sed et armenta impetit; a
quo molossi ea tuentur
(custodiunt), hos autem ab
illo nullus.

411. Vagi pastores, pascua
quotidie mutant, mapalia
sua carris circumvehunt.

412. Mandrae sunt tralatitiae caulae, in quas compelluntur oviculae, si ovile longius absit.

413. Bubulci boves e bubilibus, subulci haris (suilibus) porcos buccina pastoritia evocant.

414. Illi in praesepibus, hi in aqualiculis pastum herbaceum, stramenticium (palaeteum), frumentaceum praebentes, stabula pala expurgant.

415. Vitulus et subrumus agnellus ex ubere colostram (colostrum) sugunt. Ancilla vero mulget, mulctra (mulctrali) lac excipiens.

416. E lactis cremore (flore) confit butyrum; e lacte coagulato caseus, sive is sit vaccinus, sive ovillus, sive caprinus: in quibus tamen Parmensis principatum obtinet, scobina descobinatus. Quod tandem superest, serum est.

417. Vacca praegnans forda (horda) dicitur; nondum foeta, bucula (junix, juvenca).

418. Foenum e pratis

secula desectum et
sicilitum, siccatur, rastris
(rastellis) corraditur, furcis
(furcellis) in metas
(cumulos) aggeritur, post in
foenilia devehitur aut
comportatur.

419. E renascente gramine
chordum fit, expediens
nutrimentum si laete
germinavit.

XXXVI. DA LANIENA (LANIONIA).

420. Lanio (lanius) altilia
(vescula enim non sunt
vesca (esculenta): ecquis iis
vescatur?) in laniena
(laniario) mactat, id est
jugulat, excoriat (deglubit),
dissecat; et in macello
venum exponit bubulam
(non autem bubalinam),
suillam, vervecinam,
vitullinam, haedinum:
rarenter aprugnam, aut
aliam ferinam.

421. Intestina pulpa
effarciens, farcimina, ut
faliscos ventres, lucanicas
(botulos), hillas, tomacula,
apexabones, tuceta (isicia):
itemque ossas penitas,
pernas, petasones et
succidias conficit.

422. Adeps non concrecit
aeque spisse ut sebum, quia
opimior.

XXXVII. DE VENATIONE.

423. Venator arbusta
indagine circumcingens,
feras in foveas pellicit; aut
canum sagacium odoratu
per vestigia vestigat, et
venatur.

424. Odoratores enim
indagant ac nictunt:
vertagi persequuntur et
assequuntur.

425. Cerva ut in casses et
plagas varis tentas et
epidromidibus (epidromis)
passas incidit, implicatur,
irretitur, et interimitur: si
evasit, accelerat fugam.

426. Aper spumans et
frendens venabulo
transadactus interficitur.

XXXVIII. DE
PISCATIONE.

427. Piscator in lacu et
piscina reti, verriculo,
jaculove et tragula in amne
sagena et nassa piscatur:
hamo (cui esca inditur)
ubivis. Fuscina (tridente)
confodit anguillas.
Excipulis intercipiuntur, in
fiscella piscatoria
(scirpiculo) asservantur
capturae.

XXXIX. DE AUCUPIO SEU
AVIUM CAPTURA.

428. Auceps area
praeparata, per illices
allectas inescatasve
aviculas, vel reticulis
adobruit, vel calamis
viscatis (quos amiti seu
perticae aucupatoriae
adaptat) implicat, vel
tendiculis aut laqueorum
transennis illaqueat, aut
decipula impedit
(intercipit).

429. Oscines quas vita
donat, caveae sive junctim
sive separatim inclusas ex
alveolo (canaliculo) et
potistride (potistra) alit.

430. Si qua pedica sese

expedit (extricat), avolat:
nec facile eam reprendas,
nisi se iterum hisce tricis
intricet.

XL. DE COQUINARIA.

431. Promus—condus, vel
proma—conda penum et
obsonia ex penario (cella
penaria, promptuario)
profert: sed coquus ab
obsonatore coempta
frustatim concidit, in foco
luculento lebetibus,
cucumis (ahenis), et cacabis
elixat, verubus in
crateuterio versatilibus
assat, craticula torret,
sartagine frigit.

432. Si quid fervet et
bullit, ne ebulliat, trulla
confutat. Si spumat,
tudicula despumat.

433. Fuscina (creagra)
extrahunt fervida, colo
(fiscella, qualo) colant.

434. Residua culinae
utensilia sunt rutabulum,
batillum, focus,
ignitabulum, tripus, radula,
crates, trua, alvei, urcei,
paropsides (lances, catini,

patinae); quae cum eluuntur, fit colluvies. Labrum autem est, in quo lupini macerantur, ut eorum amaricies edulcetur.

435. Vas ansa prensabis; sed si anceps est, ambigas qua arripias: et magis adhuc si ansatum non fit, ne subvertas.

436. Aves deplumantur, pisces desquamantur, exenterantur, aut exdorsuantur etiam.

437. Assati et frixi salubriores sunt quam elixi et jurulenti, nisi plusculum condiantur.

438. Salsamenta, conditanea, et infumata aegre concoquuntur: atque

eapropter sanitati parum
secunda.

XLI. DE
POTULENTORUM
PARATU.

439. Vinitor vites novellas
plantas, traducibusque
propagat. Vineam bidente
pastinat, et repastinat:
palmites pampinosos
vitilibus vinctos ridicis
(pedamentis) statuminat
(palat): paulo post
pampinat, tum vindemiat,
racematione pauperibus
relicta.

440. Uvor dulcis in
vindemia ex acinosis uvis
in cupa prius calcatis
torculari exurgetur: qui e
lacu (lacusculo) in cadum,
orcam aut seriam translatus
mustum, et posteaquam
fuerit defaecatus, vinum
dicitur: potus exhilarandis
maestis accomodus.

441. Annotinum est
optimum, horum nonnihil
feculentum.

442. Factitia sunt
absinthites, helenites,
Hoppocratium, etc. aliaque
medicata.

443. Defrutum est sapa;
exoletum, vapa; fugiens,
quod aetati cedit.

444. Hoc ubi non
abundat, mulsum
(hydromeli) coquitur:
itemque cerevisia (zythus)
ex farre tosto (byne) et
lupulo.

445. Abditur in cellas
frigidiores et obturatur
(operculatur) promiturque
siphone (siphunculo) aut
epistomio.

446. Capacioribus in cupis
sapidius est quia non
evaporat, praesertim
cantheriis alioribus
superpositum.

447. Ex inclinato dolio
faeces una (insimul) exeunt:
et quidem copiosus, si
commotes.

448. Ex vinaceis (flocibus)
confit lora seu posca,
fontana ac puteali
(puteana) aqua aliquanto

commendatior.

449. Infundibula ad lagenas et fidelias acuminatas pertinent, quae non nisi guttatim implentur.

XLII. DE AURIGATIONE.

450. Equiso in equili equum capistro alligatum, aut fiscella (carno) si mordax sit constrictum, dentata strigili purgat, gausape insternit. avena quam vanno ventilat, excussis ad ventulum retrimmentis cibatur, et aquatum educit.

451. Eques ephippio insidens, stapedibus insistit, calcaribus manum instigat, freno (habena) sive oreo pro lubitu flectit (obliquat), pastomide autem coërcet.

452. Antilena, postilena, dorsuale, avertae, aureae, et

phalera, ornatui sunt.

453. Succussator equitem
quassat; gradarius molliter,
tolutarius (asturco) tolutim
gradiens non cespitat.

454. Auriga parippum
sellario jugat, antecessores
ante se agit.

455. Magnates sejugibus
vehuntur, pilentis et
carpentis (pampillis).
Plebeii quadriga, triga,
biga, idque rhaedis et
essedis: alicubi etiam cisiis.

456. Onera plaustreis
(sarracis) trahisque,
aegrotantes arcera, delicati
tectica transvehuntur.

457. Currus habet axes
(qui ut axungia ungantur,
succula sustolluntur) et
rotas ex modiolis radiis
duodecim, apsidibus sex, et
totidem canthis contextas,
quibus praefixum est
embolium.

458. Temonis orae
(extremitati) admoventur
de helcio dependentia
retinacula (sive sint
catenae, sive lora), pone
autem sufflamen ad
sufflaminandum in
praecipiti descensu currum.

459. Cum per orbitas
levius trahantur vectabula,
ne exorbites, respice.

460. Clitellae mulo aut
caballo imponuntur, ut per
loca praecipita et invia
transitum alium non
ferentia, onera
transferantur.

461. Bajuli vel humeris vel
feretro (aerumna de collo
suspensa) bajulant, vel
unirota protrudunt.

XLIII. DE NAVICULARIA.

462. A transmarinis
apportaturi quaedam
nautae, mare (aequor)
naufragum navigant, ora e
prymnesio soluta.

463. Nauclerus
gubernaculo assidens
clavum gubernat,
navarchus imperitat. Alii
per pergulas (ageas) et per
foros cursitantes ad
antennas vela (acatium
nempe, thoracium, et
quandoque etiam
supparum) alligant, eaque
ad ambo usque cornua
diducta, trajectis per
carchesium funibus
subvectant, vel contracta
demittunt: alii epidromum
puppi, dolonem in prora,
aplustria in mali fastigio
defigunt.

464. Tranquillo salo
velificatio non procedit, nisi
remiges per transtra ad
scalmos considentes
(identidem celeusmate per
celeusten inclamandi et
exhortandi) remigent, vel
remulco navim trahant
helciarii, vel ubi opus,
contis trudendo a brevibus
et scopulis propellant
navicularii.

465. Nam in illos si
incidant, naufragio
periclitantur, ni jacturam
faciant necessitudine id
efflagitante. Idcirco
profunditatem bolide
exquirunt, ne alicubi
adhaerescant et naufragium
faciant.

466. Vento minus secundo
(adverso) obliquandi sunt
sinus carbasorum vel
remulcandum est. Procella
oborta ne abripiantur a
decumanis fluctibus,
anchoram rudenti annexam
jaciunt atque ita fluctuant et
jactantur.

467. Primam navigans (naviculans) (sive corbita, sive celoce sive etiam lembo invehatur, perinde est) nauseam vix effugit, si quidem paulo velocius a flabris aspirantibus impellantur.

468. Navis vacua, praesertim actuaria, quo firmitus innatet, saburra oneratur: sed si plus nimio, pessum ibit.

469. Ubi fatiscit (quod multoties fit), nautea per hiscentes rimas illabitur, atque in carinam confluit: unde antlia exantlatur seu sentinatur. Post, ut rimulae omnes stipentur, phalangis in siccum subducitur; et commissurae stupa aut musci coma referciuntur ac ferruminantur, tandemque oppicantur naupegis.

470. Navigatione peracta, actutum navigia in portum appellenda sunt, aut certe in opportunam stationem (navale) deducenda.

471. In navigabili flumine raro triremibus ac liburnicis onerariis, ut plurimum vero lintribus, scaphis, cymbis et

phaselis utimur, qui remis
provehuntur, immo et
ratibus.

472. Ubi vadum deest,
pontone trajiciunt,
diciturque trajectus: sed
portitor naulum poscit.

473. Alibi fiunt pontes
lapidei vel sublicii, et
pensiles: itemque ponticuli.

474. Urinatores quaevis
profunda tranant submersa
perquirentes.

XLIV. DE ITINERIBUS.

475. Viator, quo tendit,
recta sine ambagibus
proficiscatur, ad
deverticula ne divertat.

476. Semitae causa viam
ne deserat, nisi tritus sit
callis et itineris dux
comesve peritus praesto.

477. Avia (devia) et
salebras qui metuit,
nusquam deviet.

478. Bivium et trivium
fallax est: quapropter ne
erres, obvios sciscitare, qua
eundum? Num hac an illac,
prorsum an rursum,
dextrorsum an sinistrorsum
flectendum sit?

479. Tramites et compita non aequè seducunt.

480. Peregrinari ut absque interprete possis, idioma calle.

481. Peregre ituro ocreae competunt aut perones ob caenum; et petasus (galerus) ob solem; et rheno aut mastruca ob frigus; et lacerna scortea vel penula e coacta lana ob pluvias; et baculus (baculum) seu scipio, quo nitatur: adminiculo enim est.

482. Opus et viatico ad faciendas impensas: vel literis (tessera) collybisticis ab aliquo collybista.

483. Sed et patientia: sub dio enim pernoctare obtingit.

484. Ubi ubi es, quicum (quocum) sis attende, quid occulte geratur quam sagacissime aucupans.

485. In peregrinationibus enim intuta sunt omnia.

Latrones trucidant,
praedones spoliant, piratae
arreptos abducunt. His
igitur latrocinantibus ac
praedantibus ne obvies,
cauto opus. Immo ne in
hospitiis quidem,
praesertim apud caupones,
hospes ab hospite tutus est.

486. Ut sarcinam tuam
commode gestes, vidulus,
mantica, pera
(sacciperium), bulga,
marsupium (crumena,
loculus, funda), denique
sinus opus est.

487. Ut expeditior sis,
impedimentis ne te
aggravato: remorantur
enim festinos.

488. Si maturandum
(celerandum) est, veredis
(celetibus) uti praestat,
quam meritoriis equis.

489. E longinquo reducem
salvum et sospitem
laetabundi tui te excipient.

XLV. DE MERCATURA.

490. Mercatores, bona aliunde allata non absque lucro (quis enim cum damno negotiaretur?) dividunt.

491. In emporiis celebria exercentur commercia: oppidatim mercatus solenes et nundinae instituuntur. Monopolia incolis molesta esse et parum conducibilia notorium est.

492. Et propolae et institores et tabernarii quaestum facientes in cadurcis suis, et circumforanei et scrutarii (grytopolae) cum scrutis suis frivolis negotiatore dici volunt.

493. Et quidni? Ubique sane merx licet (venit), venditor venalem exponit, et indicat quanti: emptor licetur (licitatur) donec

convenient.

494. Sed qui mercatur, ne se defraudet in emptione, nummorum (qui aurei sunt, vel argentei, vel aerei) teneat valorem: ut oboli, semoboli, teruncii, semissis, assis, grossi, denarii, floreni, solidi imperialis, scutati, coronati, etc.

495. Nec qui vetustus rerum aestimationes investigat, nescius sit talenti Attici, quod valuisse volunt antiquarii sexaginta minas: mina autem valuit centenos denarios (drachmas) seu quadringentos sestertios: sestertius autem duos circiter crucigeros monetae Germanicae.

496. Pretium annonae ingravescit aut remittit prout ejus raritas aut affluentia est: sed nihil carius constare ajunt, quam quod precibus emitur.

OPIFICIIS.

497. Linum et cannabis macerantur in lacunis, et exsiccata frangibulo conteruntur, tum carminantur (caruntur) carmine, remanente ibi flocco, hic stupa.

498. Dehinc netrices penso ad colum applicato fila trahunt (nent), sive rotula sive fuso cum verticillo.

499. Ex fuso fila in girgillum deducuntur, inde in rhombum, ex rhombo glomerantur glomi, et fit tela.

500. Textor conculcans insilia (binae complanatae (aequatae) trabeculae sunt, quae alternatim (vicissatim) consurgunt et recidunt), stamini tramam (subtegmen) subtexit, et ita linteum et carbasum conficit: quod ut candescat, insolatur.

501. Bilix duplicatum, et trilix triplicatum licium requirit.

502. Idem propemodum in lanificio fit: quod artificiosius contextitur.

503. Pectitur lana vel gossipium (bambacium) et carminatur a lanario, netur a lanifica, dein textitur, et pani transeunt in pannum laneum: quem fullo constipat et condensat, tinctor in cortina tingit, quendam saturo, quendam diluto, [et] quendam pertinace, quendam evanido (fugaci) tinctus.

504. Sartor forfice scindit, acu et digitali indumenta suit: sed ne suturae notabiles sint, quandoque et dissuit, rursumque scissuras consuit plicatque.

505. Qui vetera sarciunt (resarciunt) veteramentarii, qui interpolant mangones sunt, ablecta (interpola) venditantes.

506. Coriarius coria lixivio elaborat: e quibus sutor (calcearius) calceamenta in sutrina ad modulum (formulam, mustricolam) subula et filo piccato conficit.

507. Pellio e pellibus
pellicia construit.

508. Alutarius alutas
praebet; sed omnes hi per
ludibrium cerdone
audiunt.

XLVII. DE VARIIS
VESTIUM GENERIBUS.

509. Vestis ad
obtegendam nuditatem e
paradiso ejectis data, stulte
a phrygione acu pingitur et
ad fastum adhibetur.

510. Moles nobis est et
remora, dum induitur toties
et exuitur.

511. Alii laxa veste
gaudent, alii stricta, habitu
vario et quandoque
segmentato.

512. Vestitus lugubres
sunt epomis, calyptra,
ricinus (ricinium). Virilis
autem familiaris amictus
est thorax cum manicis,
colobium, subligaculum
(femoralia, bracciae), toga
talaris, lacerna. Chlamys
vero, sagum, abolla, laena,
paludamentum, caligae

militaria sunt.

513. Feminus: amiculum (amictorium), palla striata, stola, supparus (peplum carbasinum), cyclas, calantica (reticulum, rica), praecinctorium (castula, semicinctium), vitta albens, mitra.

514. Communis: theristrum, indusium, interula (subucula), pileus, galerus acuminatus, pileus nocturnus, tiara, tunica, chirothecae, tibialia, periscelides (genualia, fasciae crurales), calcei (soleas obstragulum [et] corrigias habentes), calones, socci, crepidae, subere mollita sandalia, cothurni (tragoedis cumprimis usitati), et calopodia ferrata, quibus mira dexteritate et incredibili celeritate per congelatas aquas labuntur.

515. Omnia, ubi convenit,
aciculis, uncinulis
(spinteribus), fibulis,
nodulis, et globulis
connectuntur (nexantur,
adstringuntur).

516. Cingulo nos
cingimus et discingimus,
ligulas nodis astringimus
aut solvimus.

517. Pallio amicimur et
ornamur.

518. Ornamenta
adjiciuntur: redimicula
(quibus cincinni et alia
redimiuntur), taeniae,
fimbriae, limbi, institae,
segmenta, syrmata
(peniculamenta), lemnisci,
laciniae.

519. Item annuli, torques
(muraenulae), monilia,
armillae (brachialia),
inaures (quae auriculae
lobo insertae, stalagmia
nominantur), aurifabrorum
et gemmariorum opera; nec
non linteola, muccinia,
strophia, sudaria.

520. Bardocuculli
naviculatorum, centones

(qui ex paniculis et ex
assumentis consarcinati
sunt) inopum sunt: qui
rurantur, levidensi
tunicantur.

521. Gynaecium suum
sibi mundum habet,
matronae pedissequas.

XLVIII. DE
ARCHITECTURA ET
FABRILIBUS ARTIFICIIS.

522. Primitus in specubus
(cryptis), cavernis, tabernis,
et frondeis tabernaculis, ut
et cespitiis (caespitiis),
tuguriolis, gurgustiolisque
habitabatur: nunc aedificiis
distegis et tristegis omnia
referta sunt.

523. Haec alicubi excelsa
sunt, alibi humilia.

524. In casa exili quis
lubens degit?

525. Architectus jactis
substructionibus aedificat,
adjuvantibus fabris, securi
et malleo (marculo) opus
suum peragentibus.

526. Faber murarius
(caementarius) a caemento
et saxo, a lapicida (latomo)

reciso, et e lateribus in
calcaria excoctis, calceque
bene subacta
conferruminatis ad libellam
et perpendicularum muros
fabricatur: quos tectorio
incruiat aut gypso dealbat
aut opere intestino
illigatisque emblematis
conuestit.

527. Lignarius (tignarius)
faber, trabe ferreis ansis
firmata, ad amussim (creta
vel rubrica signatam) ascia
asciat (segmentis et assulis
dissilientibus), terebra
terebrat (forat), trochleis
elevat, parietes coagmentat,
[et] clavis consolidat, quos
distorte impactos forcipe
dentato, qui bisulcus est,
emolitur. Parietinas autem
restaurat.

528. Ligna ne cariem sentiat, post plenilunium succidantur.

529. Lignator arbores sternit et ramis truncat, serra reciprocando dissecat, scobe recidente tuditeque cuneum adigit, itaque findit et ubi diffidit strues componit, ut et sarmentorum fasces et decisa virgulta.

530. Scriniarius (arcularius, capsarius) asseres runcina et dolabra edolat, subscudibus coadunat et coarctat, glutine (colla) conglutinat, vernice illinit.

531. Faber ferrarius in ustrina follibus inflat ignem, emollitumque et forcipe prehensum ferrum super incude cudit, ut stricturae emicent, inque laminas et bracteas diducit.

532. Serarius (claustrarius) et polio (politor) lima limat (reliquiae sunt ramenta); planula vero laevigat et polit, ut niteat.

533. Eodem pertinent fabri aerarii, carpentarii

(plaustrarii), stannarii, automataarii: item scandularii, vietores (doliarii), tornatores, vitriarii, et qui restes torquent, restiones.

534. Operarii (operae mercenariae), mercede conducuntur ut ministrent, ut vectibus onera tollant, phalangis volvant, etc.

535. Figulus ex argilla ollas, fidelias, opercula, aliaque figlina fingit.

536. Domus alte fundata, assabre instructa, angulis bene solidata, columnisque stabilita, perstat diutissime incolumis.

537. Alias ruit defetiscens, fiuntque ruinae ac rudera.

538. Vacillantem itaque pilis vel aliis fulcris fulciri, labantem refici aut dirui, collapsam destructamve instaurari (reparari) et renovari necesse est.

539. Domicilium amplum commodam facit

habitationem, arctum
incommodam.

XLIX. DE DOMO
EJUSQUE PARTIBUS.

540. Ingressurus per
anticam in aedes, ne a janua
aberes, in vestibulo
subsiste, et frontispicium
intuere. Demum, si ligula
non prominet, ut attracto
vecte patecat, pulsa
cornice (cantharo, marcuro).

541. Si quis per
transennam (septum
cancellatum) vel per
clathros (id est, ferramenta
lignave reticulato textu)
prospectat, aperiatur roga.
Si janitor aperit (patefacit),
pedem, ne ad limen
offendas, attole; caput, ne
ad superliminare allidas
(impignas), submitte.
Utrique postes erunt.

542. Ubi intromissus
pertransiveris, ostium
occlude, pessulum
obdendo aut obicem
saltem.

543. Cardines ne
strideant, aut fores crepent,
lente commove.

544. Ex atrio in caetera
conclavia aditus est. Per

scalas aut cochleam, ad superiores contignationes (tabulata) penetra.

545. Tectum columinibus incumbit; tignis et tigillis tegulae et imbrices vel scandulae. Culmen stramineum est.

546. Additamenta sunt projecturae, suggrundia, meniana*, procestria, et anteridibus (antibus) innixae pergulae ac podia, ut et coronides. Aquilegia ut plurimum subterranea sunt.

547. Impluvium areola non contexta dicitur, ubi impluit. Per posticum exitus est alio.

548. Sera clave (clavicula) clauditur et recluditur

(obseratur et reseratur).

L. DE HYPOCAUSTO.

549. Hypocaustum (vaporarium), fornace calescit.

550. Fenestrae sunt vitreae ac lignae, et hae cancellatae (clathratae).

551. Pavimentum fistuca pavitum aut tessellatum est. Laquear (lacunar) tabulatum, idque vel segmentatum (scalpturatum) vel fornicatum.

552. Servandis rebus receptacula (reconditoria) sunt: arcae (cistae), armaria, risi, capsae, capsulae fictiles; transportandis vero, sportae (corbes), cophini, calathi, quasilli, etc.

LI. DE COENACULO.

553. Mensae mappis stratae, disci (sive sint orbes sive quadrae) superimponuntur, ut et salinum.

554. Apponuntur e canistro panis, collyrae, aut buccae scissae, tum fercula.

555. Invitati convivae a convivatore (convivante) in triclinium (cenaculum) introducuntur.

556. Et ubi super malluvium e gutturnio, aut super pelvim ex aquali, se laverunt, et mantili terserunt, per scamna, vel disposita sedilia, suppositis scabellis, juxtim assident (assidunt), aut accumbunt.

557. Extemplo in procinctu est structor, qui dapes appositas, et aggestas praelibat, et disperitur (distribuit).

558. Fuscula, pulmenta (pultes), et intritae, cochlearibus, caetera edulia cultro aut furcula (quam manubrio tene) sumuntur.

559. Civiles labia non exerta lingua lingunt, lambuntve, sed mappella (mappula) detergant.

560. Neque
tuburcinantur, nec bolos
aut frusta glutiunt, sed
mandendo (mansitando)
comedunt.

561. Muscae abiguntur
flagello (muscario).

562. Depromuntur e
repositorio phialae
(crateres, paterae)
deauratae, scyphi (calices,
cyathi), et pocilla quae uno
sorptu exhauriri ac educi
possunt, vitra, et cululli;
eaeque proluta et in echino
defricata in abaco
reponuntur.

563. Patera est patulo
orificio poculum.

564. Tum pincerna
temetum, quod expromsit
cellarius, ex obba vel hirnea
(cirnea) vel cantharo,
infundit, et porrigit:
propinantque alii aliis
geniales haustus.

565. Opiparum
convivium lautas habet
epulas, et matteas (mattyas)
aliaque palati scitamenta, et
quidem diversos missus:
domicenia moderatiora et
frugaliora sunt.

566. Assaturis
superadduntur in scutellis
embammata (intinctus),
raphanus et salgamata,
olivae, cappares,
cucumeres, beta rubra;
tandemque bellaria
(tragemata).

567. Verum enimvero
placida et festiva colloquia,
lepidaeque confabulationes,
praecipuum sunt
condimentum,
oblectamentumque.

568. Edaciores jentant,
prandent merendam edunt,
et cenant: sed qui
sedentariam vitam agunt,
jentaculo et merenda
abstineant, prandio et cena
contenti.

569. Ter de die saturari,
nimium est: et nocet nisi
parce fiat.

LII. DE CUBICULO CUM
PERTINENTIBUS.

570. In dormitorio,
sponda cubile sistinet. Sed
deficiente lecto, storea aut
matta substernitur.

571. Strato
superinjiuntur candida
lodix, toralia, et cervical.
Tegetibus et stragulis nos
integimus.

572. Pulvinar plumeum
est; culcitra (culcita)
tomento aut evulsis plumis
farta.

573. Matula vesicae
levandae, et secessus
(latrina) alvo exonerandae;
cubiculo necessaria
requisita sunt.

574. Grabatus cum
conopeis pro meridiana aut
pomeridiana quiete est.

575. Qui supinus cubat et
dormit, incubo (ephalte)
molestatur; qui pronus,
anhelitu.

576. Si edormisti et
evigilas, ne obdormias

ursum: expergefactus
(expergiscens) expergefac
alios.

577. Hiberno (brumali)
tempore antelucana
diligentia (industria)
probatur.

LIII. DE BALNEO ET MUNDITIA (MUNDITIE).

578. Limpida faciem
saepius abluere munditiei
est; fuco fucare, spurcitiei
ac lenocinii.

579. In lavacris, balneis, et
thermis, sordes, illuvies, et
paedores (squalores)
eluuntur. Sudores in assis
eliciuntur, adapertis poris.

580. Ubi tamen honestatis
ergo (causa, gratia)
subligacula (subligaria) et
castulae locum habent.

581. Sed et vestimenta
lavantur ac mundantur
sapone (smegmate), aut
everruntur setaceo pectine
vel scopula, aut
exterguntur spongia.
Collaria roborantur amylo.

582. Cilicio et pumice nos fricamus. Vascula stramento (stramine) vel equiseto stringuntur, ut sincera sint; ne, si quid infundas, acescat. Quisquiliae (purgamina, purgamenta) scopis a scopariis deverruntur.

583. Ubi puteos non effodiunt, e quibus (crepidine circumdatis) tollenone et haustro vel situlis hauriant, aquaeductus per tubos et canales aut incilia fieri convenit.

584. Tonsor in tonstrina crines forfice tondet (olim vellebant aut intervallebant, ut et ovium vellera) aut deglabrat novacula.

585. Balneator insuper scarificat.

586. Coma (caesaries) quam Germani, sicut Poloniantias (capronas) alunt, pectine pectitur et comitur. Calamistro cincinni passi, rejecti, et refugi crispantur.

587. Uctiones, suffimenta (suffitus), et odoramenta, aspersionesque ex ampullis voluptuariorum sunt, quibus delibuti fragrant.

LIV. DE CONJUGIO ET
AFFINITATE.

588. Conjugium est quum
maritus et maritata ut
conjuges cohabitant.

589. Caelebs
matrimonium initurus,
dispicit sibi quam procet et
exambiat virginem nubilem
(viraginem), si non
elegantem aut dotatam,
tamen pudicam, illibatam,
pudiceque educatam; at
viduus viduam. Huiusmodi
consortium compar est, et
pulchre quadrat.

590. Dos et forma
nonnunquam rivales
exciunt.

591. Procus quum obtinet
ut sibi despondeatur, fit
sponsus; et quae nubit,
sponsa. Ille suum
pronubum
(paranympum), haec suas
pronubas habet.

592. A nuptiis maritus et
uxor (marita) dicuntur.
Postridie repotia fiunt.

593. Qui natam elocavit,
socer est, et socrus; qui
duxit, gener; quae nupsit,

nurus. Reliqui agnati ex eo se affinium titulo cohonestant. Levir (laevir) glorem compellat.

594. Si connubium non arrideret, permissum erat olim nuptam repudiare, fiebatque divortium. Hodie nil, nisi obitus, et si alteruter adulteret, eos seiungit.

LV. DE PUERPERIO.

595. Ut sexus, ita conjugalis copula thalamusque prolis (posterorum) causa est.

596. Vir in utre liquorem, infantaria (gravida) mulier in utero (matrice, vulva) foetum gestans, uter plus praestat?

597. Haec profecto, quae nisi abortit, filios et filias enititur, quandoque gemelos, raro tergeminos.

598. Puerpera si puellulum peperit, sex septimanis (hebdomadibus) latitare lege tenetur; si filiolum (puellam), bis totidem.

599. Pater gignit, mater parturit, mox partitura. Ambo liberos educant, suaviantur (osculantur), in

sinu gremioque refovent.

600. Vitricus et noverca privignos et privignas non eo modo diligunt quia ille genitor non est, haec non edidit. Detrahunt iis plus quam conferunt. A neutro functioni satis fit.

LVI. DE COGNATIONE.

601. Qui eiusdem sunt progeniei et prosapiae, cognati et consanguinei dicuntur, ut sunt fratres et sorores (praesertim Germani, nam uterinos esse non tanti habetur), avus, et avia.

602. Item proavus, proavia, abavus, abavia, atavus, atavia. Quod supra est, maiores vocamus.

603. Collaterales sunt patruus et amita, avunculus et matertera, patruelles, sobrini (consobrini), et amitini.

604. In descendentium serie sunt nepos et neptis, proneptos et proneptis, cum omni posteritate.

605. Sunt qui cum careant sobole ac haeredibus, extraneos adoptant ut bene parta cernant. Sunt e contrario, qui suos ob inobedientiam exhaeredant abdicantque.

606. Superstitibus pupillis (orphanis) et minorennibus tutores testamento dantur, haereditatis conservandae gratia, cuius et posthumi participes sunt, minime vero spurii et nothi.

607. Illi autem si tutela deposita inventaria (repertoria) non edant, de rationibus conturbatis haud inique suspecti sunt.

608. Testanti autem facultas est, facultates suas partiendi, deque iis dispensandi et legandi cui videtur, dimidium (semissem), trientem, quadrantem, sextantem, dodrantem.

LVII. DE OECONOMIA.

609. Quomodo oekonomus, paterfamilias et materfamilias familiam (famulitium) administrare, famuli et famulae obedire debeant, oeconomica praescribit.

610. Herus est qui servum

habet; hera, quae servam;
verna, qui servit ubi natus
est; mancipium, in quem
vitae et necis potestas est;
libertus, manumissus.

611. Pensum facienti
dimensum suum debetur,
diurnum, menstruum,
annuum.

612. Liberis (praesertim
morigeris) parentes multa
indulgent. Indulgentia
tamen, si nimis blanda est,
natos segnes ac degeneres
facit.

LVIII. DE URBE.

613. Urbes et castella
muniunt moenia, aggeres,
valla (vallos),
propugnaculaque.

614. Intervallum
(interstitium) habet fossam.
Pomerium intro est, qua
civibus ad moenia patet
accessus.

615. Porta habet claustra
sua, valvas, repagula et
cataractas.

616. Plateae lapidibus
sunt stratae, quae si

utrinque contiguas aedes habeant, vici dicuntur, ut et forum cum porticibus ne lutosae sint ambulationes.

617. Angiporti (angiporta) ut plurimum impervii sunt.

618. Suburbiis oppidum ampliatur, turribus (quae in summis metis bracteam versatilem superimpositam habent) decoratur, potissimum si lapide structae sint et fastigiatae (cacuminatae).

619. Non cuncti incolae privilegiarii sunt, sed indigenae et municipales.

620. Ex his quidam a censu et oneribus publicis immunes sibi privatim vivunt.

621. Peregrini et inquilini sunt vectigales.

622. Templum, senaculum, armamentarium, aerarium, granaria civitatis robur sunt.

623. At cisternae, horologia, scholae bene ordinatae, belli regiminis indicium ac documentum.

624. Pone praetorium custodia poni solet; in recessibus, foricae.

625. Diversoria,
cauponae, popinae, pro
advenis parantur; asyla
(refugia) pro sontibus;
xenodochia pro
pauperibus; nosocomia
(valetudinaria) pro aegris.

626. Basilica est augusta
aedes, vel domus.

627. Specula in editiore
loco sit, vigiles autem
vigiles.

628. Vicini ac propinqui
mutua sibi officia
(ministeria) debent.
Convenae aliunde
confluunt.

LIX. DE TEMPLO.

629. Aedituus
campanarum pulsu coetum
ad sacra convocat.

630. Ubi conventum est,
cantorum chorus ad
pluteum psalmos et
hymnos (cantilenas
spirituales) decantat.

631. Concionator
(ecclesiastes) e suggestu
(pulpito) concionaturus
Spiritus Sanctum invocatur,
textum Biblicum (e Bibliis)
authenticum, ejusque
mysteria et alia mystica
concionando interpretatur;
scripturas utriusque
Testamenti (instrumenti) ex
libris potius canonicis
quam apocryphis citat; ad
contritionem et
poenitentiam
(resipiscentiam) juxta

decem praeceptorum
(decalogi) tenorem
hortatur; contrita corda
satisfactione meritoque
Christi crucifixi solatur: hoc
scilicet modo Evangelium
praedicans, et Catholica
religione auditores rite
imbuens.

632. Peracta precatione
(oratione) festa indicit et
concionem (quae quo
fequentior, eo charior)
dimittit.

633. Nonnunquam
catechizat (hoc est,
periclitatur catechumenos),
baptizat ad baptisterium,
alibi cum alibi sine
exorcismo, ubi susceptores
sunt arbitri initiationis.
Synaxin sacram seu
Eucharistiam ministrat.

634. Absolvit poenitentes,
a Sacramentis arcet
impoenitentes, hypocritas
conscientiae suae committit.

635. Encaeniae et
anniversariae feriae
(exempli gratia compitalia)
solemnitate debita biduo,
triduo, octiduo celebrantur.

636. Ceremoniae non apud omnes eaedem sunt, nec ordinandi et initiandi ministros mos idem. Sed disparitas haec innoxia est.

LX. DE ECCLESIA.

637. Parochus (curio) legitime accitus est suae paroeciae inspector; illius autem antistes, totius dioecesis.

638. Praesules (praepositi), abbates (archimandritae), et priores cucullatis monachis monasteriisque (coenobiis); abatissae, monialibus (vestalibus); sacellani, sacellis; diaconi collectis et eleemosynae praesunt.

639. Primitiae et decimae sacerdotibus (presbyteris) offeruntur. Eremitae

(anachoretæ) eremum inhabitant.

640. Archiepiscopi, episcopi, et orthodoxi mystagogi in conciliis (synodis) schismata et miscellas sectas componunt. Haereticos, blasphemos, cum asseclis heterodoxis, et temerariis novatoribus, apostatasque, ab Ecclesiae unione excommunicant. Doctrinae canonem constabiliunt. Christianismum autem (cuius professionem spontaneam adamat Servator noster) violenta coactione et correctione proferre aut suffulcire non allaborant. Hoc enim si non atheismi, certe aut hypocriseos, aut martyrii mare longe patens atque inundans aperit.

LXI. DE ETHNICORUM JUDAEORUMQUE SUPERSTITIONIBUS.

641. Pagani (gentiles, ethnici) sacrificuli in delubris, lucisve suis, sacrificia, libamina, et hostias (victimas) super aras (altaria) immolabant, thura libabant et adolebant, et sic idolis suis operantes (sacrificantes) lustralique aqua sese lustrantes et hinc

ficte litantes, piacula
expiabant. Sed abominatio
illa fuit.

642. Profanum apellabant,
ceu minus sacrum,
quicquid extra fanum esset
non consecratum;
augustum contra.

643. Pontifex infulatus
adytum (sacrarium)
introibat. Flamines
thuribulo (acerra)
suffiebant, cymbalis,
tintinnabulis, nolis,
crotalisque tinnientes.

644. Vates (mantes)
eorum, sagae et piatrices
vaticinabantur, et futura
praedicebant, non ex
numinis afflatu
(inspiratione) ut prophetae
Israelis sed ex auspiciis,
auguriis, haruspicina,
sortibusque (sortilegiis)
superstitiosis: inde
auspices, augures, harioli,
aruspices, sortilegi dicti.

645. Hinc hariolari et
augurari, pro divinare
usurpabant.

646. Habebant et oracula,
verum erronea, a Vejove
profecta.

647. Indigetes seu

demortuos heroas divis
accensebant, anathemate
ferientes aut plane
internecantes suae
superstitionis derisores.

648. Iudaei in synagogis
praeputia circumcidunt,
Sabbato feriantur, et
maledictis spurcissimis
impetunt Messiam
nostrum. Veteres
Anabaptistae, et eius
commatis maleferiati
homines fanatici erant.

LXII. DE CURIA.

649. In curia senatus
consensus suos, et de
republica curas agit.

650. Asservatur ibidem
matricula civium (leucoma,
album) et tabulae publicae
actaque civica (breviarium).

651. Consul aut proconsul
deliberanda proponit,
consulares et senatores
sententias dicunt, pedarii
(pedanei) superiorum
placita assensu probant ut
succinctior sit deliberatio;
ille tandem concludit.

652. Notarius vel secretarius cancellis septus acta consignat. Et ita quisque suo munere fungitur.

653. Ministratores illis sunt apparitores, stratores, accensi, scribae, et praecones.

654. Plebs in tribus distributa suos habet tribunos, per quos plebiscita feruntur ad ratihabitionem senatus consulto.

655. Habent et opifices collegia seu curias suas, ordinis causa: ubi novitius artificium professurus censoribus et curionibus dat specimen. Romae autem tres erant ordines: senatorius, equestris, et plebeius; cui opponitur patricius.

LXIII. DE IUDICIIS.

656. Duobus de familia herciscunda aut de quacunque controversia disceptantibus, tertium intervenire necesse est, qui litem dirimat aut de quo altercantur diribeat. Alias rixae et contentiones, intemperie litigandi incrudente, in infinitum ibunt.

657. Aut igitur arbitrum sibi vel iudicem selectum (compromissarium) deligant, quorum arbitrio acquiescant utrinque. Aut sectentur forum, et experiantur jure per causidicos: praesertim compromissi, vel commissionis, vel amicabile compositionis pacificis mediis rejectis.

658. Qui adversario dicam scribit (impingit), citat et arcessit eum ad praetorem (praeterquam nefasto die), insimulat, et accusat noxiae.

659. Ad actoris petitionem, pacificatione (quae ante omnia contentioso iudicio praeferenda est) frustra et in vanum tentata, accersitur reus, qui vel ipse vel per procuratorem (mandatarium) comparet. Accusatio et excusatio percipitur cognosciturque. Si diffitetur, admittuntur probationes vel per instrumenta vel per testes, et illos quidem juratos, si autoritas per se non sufficit.

660. Advocatus seu patronus clientes (utpote qui se in clientelam et patrocinium eius contulerunt) ne deferat sed defendat, ex aequo tamen et bono ne rabula audiat.

661. Vitet et iudex praejudicia maximopere, neque favore (gratia) vel malevolentia (odio) praeoccupatus, nec misericordia flexus, nec largitionibus corruptus, neque timiditate aut aliorum offensa deterritus, vel personarum respectu motus, errorve aut mentis perturbatione (contricatione) implicatus, huc aut illuc propendeat. Sed nude secundum probatorum evidentiam ex juris norma, atque aequitate rerum decernat.

662. Si assessores adsunt, praesidis est suffragia colligere; illorum ferre libere, sed juste ut sontes damnentur, insontes absolvantur.

663. Nam decreta et

edicta consensu facta retractare ac rescindere indecens est.

664. Causae decisio ut promulgata est, ocius exsecutio fiat, nisi condemnatus protestetur et ad tribunal superius provocet (appellet). Ibi justitio comperendinationi aut etiam sequestrationi locus est.

665. Sed et vadantur quandoque litigatores, ut vadimonium obeuntes sese sistant.

666. Interdum interceditur sententiae, et dilatio adhibetur propter intercessionem, et vadium fidejussionem. Sed quod quis spondet, praestare tenetur.

LXIV. DE MALEFICIIS ET SUPPLICIIS.

667. Dum petulanter peccatur et peccata cumulantur, in delinquentes animadvertendum est, manifestoque sceleratis aut mors infligenda aut minimum mulcta irroganda, ne impunitas in licentiam abeat. Qua porro

deteriores fiunt.

668. Ad castigandos, coercendos, atque compescendos improbos ac inobedientes virgae sunt, flagella (mastiges), compedes, manicae, numellae, cippi, ergastula, carceres, tormenta, patibula:

ut per lictores et carnifices facinorosi rapiantur, vinciantur, constringantur, verberentur, torqueantur et excrucientur, aut etiam letho afficiantur desperati.

669.

- Fures enim, saccularii (manticularii), et depeculatores suspenduntur;
- moechi et homicidae (percussores) decollantur;
- latrones, piratae, sicarii, et sacrilegi crurifragio plectuntur (quondam cruci affigebantur);
- parricidae cum serpentibus culeo insuti et aquis submersi suffocantur;
- anus veneficae, lamiae (striges), et incendiarii rogo cremantur;
- perduelles (rei perduellionis) quadrigis in diversum actis discerpuntur, bonaque

eorum publicantur
(confiscantur);

- calumniatores maligni
elinguantur, insigniores
capitaliter puniuntur;
- prostibulis impudicis
cauterio stigmata
inuruntur;
- qui surrepta clanculum
receptant, lavernionibus
ipsis aequiparantur.

670. Colapho seu alapa
caedi ob quidvis contigit.
Talitrum jocosum est.

671. Supplicii mitigatio fit
vel relegatione, vel
proscriptione, qua cum
infamia quis relegatur.

672. Exul in loco
determinato exulat, exteris
vagatur, profugus nullibi
consistit.

LXV. DE STATU REGIO.

673. Potestates esse,
omnium interest, ne
potentior minus potentem
opprimat. Sed quum unus
rerum potitur, monarchia
dicitur, et ipse monarcha
(quanquam Caesares
collegas sibi legere soliti
sunt). Imperator a

septemviris (electoribus)
eligitur.

674. Qui si ex legum
praescriptio regnat, rex est;
si ex libidine (ut quod libat,
liceat) etiam sub corona
sceptroque, tyrannus.

675. Sedes eius in
metropoli est, ubi in solio
sedet eburneo (ex ebore
fabrefacto), bysso
(sindone), purpura
(coccino), trabeaque acu
picta magnifice vestitus,
aulicorum vero caterva
stipatus.

676. Qui vel sunt
consiliarii tum caeteri tum
intimi, vel praefecti ut
aulae magister, ensifer,
dapifer, pocillator,
praegustator, magister
stabuli, cancellarius suos
amanuenses (a manibus)
habens, secretarius,
cubicularii, atrienses,
celeres (a pedibus).

677. Alibi habet, aut aliorum legat vicarios, satrapas, quaestores. Publicanos et legatos, qui diplomate regio instructi, res expediunt.

678. In defunctorum locum substituuntur (sufficiuntur, subrogantur) alii, qui successores dicuntur.

679. Regia aulaeis (peristromatis), tapetibus, picturisque regaliter refulget personatque vel concentu vel instrumentis musicis.

680. Fabulatores, moriones (nugigeruli), gnathones, sycophantae aularum appendices sunt. Eunuchorum usus desuevit (obsolevit).

681. Majestas invidiae obnoxia (invidiosa) est, sed clementia praesidii vice erit.

682. Non tam principem satellites tutantur, nec tam locupletant fisci redditus aut

repositi thesauri (gaza),
quam subditorum amor.

683. Angariis igitur,
tributis, et exactionibus ne
exhauriantur. Congiariis
potius et donativis
demulceantur et
deliniantur.

684. Imperandum sic
populo, ut illi parere lubeat.
Obsequia coacta periculosa
sunt.

LXVI. DE REGNO ET REGIONE.

685. Regno sunt liberi
ordines, statutorum vinculo
inter se colligati.

686. In arduis negotiis
(causis) concientur comitia,
sed e primatibus et
proceribus (optimatibus),
ducibus, comitibus,
baronibus, et nobilitate.
Rustici iis non intersunt,
sed ruri occupantur et
comarchis obsequuntur.

687. In territorio suo
quilibet magistratus sancire
potest quod vult. Sed velle
non debet nisi quod publice
expediat.

688. Ditio (dominium) est,
ubi quis dominatur;
districtus, ubi
jurisdictionem habet;
provincia, quam devicit.

689. Gentes finitimae de
oris, confiniis et limitibus
ambigunt plerumque. Sed
si limitent fines et
paciscantur, foedus est,
quod perjuri temerant
violantque.

LXVII. DE PACE ET BELLO.

690. Pacatus status
optatissimus est. Sed
aliquando nisi vi armorum
obteneri nequit.

691. Siquidem turbatores
factitiosi et clancularii,
clandestinas factiones ac
conspirationes
(conjurationes)
disseminant; et cum
conjurarunt, tumultus ac
seditiones concitant, quae
nisi sedantur, bella
intestina erunt.

692. Hostis externus extrinsecus irrumpit, adversus quem bello defensionis causa suscepto opus est.

693. Id per fecialem denunciatur, aut per caduceatorem pax petitur si quis se imparatum aut hostili potentiae imparem arbitratur.

694. Imbellis et imbecillis nequicquam bellare (belligerare) occipiet.

695. Apparatus enim bellicus multa deposcit: militem, qui scribendus (auctorandus), armandus, et in diribitorio lustrandus est, commeatum, auxilia, dapsilesque sumptus.

696. Mature ergo stips cogenda, sicut et cibaria (victualia), et praestituendi qui erogent.

697. Tum congregandus et ordinandus exercitus per legiones, cohortes, vexillationes, turmas,

praeficiendique decuriones, centuriones, tribuni (chiliarchi), quibus adduntur optiones, omnibus denique imperator.

698. Tirones intermiscentur veteranis. Velones et dimachae* cum peditatu vel equitatu se conglomerant. Lixae, calones et caculae (ut mediastini) ad servitia adsciscuntur.

699. Armaturae satis erit, si tectus sis lorica, galea (casside) cum cudone, scuto vero, seu clypeo (ancili, parma, pelta, cetra) et hasta sis instructus, quibus dimices. Cataphracti* tamen circumquaque loricati sunt.

700. Classis navalis etiam uncus aduncos, recundosque (harpagones) hamasque poscit.

701. Gladius accomodatur ad latus, vel baltheo appenditur, ut e vagina

stringatur promptius,
evaginatusque recondatur
capulo tenus.

702. Sagittarii e pharetra
sagittas promere, arcum
nervo tendere,
ingruentesque sagittando
protelare consuescant.

703. Sclopetarii sclopeto
nitro (tormentario)
pulvere, plumboque alite
onerent, post aptato
dracone (martulo)
displodant, sed ad scopum
prorsus collimantes.

704. Expeditione suscepta
castra metari, tentoria
paxillis figere,
munitionibus sese vallare,
excubiis circummunire, et
strategematis priusquam
acie pugnare opus est.

705. Emittendi subinde
sive armati, sive inermes
speculatores et exploratores
(corycae), quorum in
militia insignis usus est, ut
et tesserae (symboli) qua
sui se recognoscunt.
Hemerodromi sub noctem
reversionem faciunt
(remeant).

706. Excursiones, vel

pabulationis quum frumentatum itur vel praedae causa, fiunt agminatim (catervatim), non sine populatione idque saepe huiusmodi, ut ne in rutis quidem (quod dicitur) et caesis quicquum residui permaneat.

707. Induciae si panguntur, dantur obsides.

708. Ad proelium educta copiae, vel in cuneum coguntur, vel in phalangem (quadratam aciem) alis munitam.

709. Vexilla in medio ferunt signiferi, quos antesignani cum spathis (romphaeis) praecedunt.

710. Tympanistae (tympanotribae), tibicines, aeneatores classicum canentes, tubarum et lituorum (cornuum) (quorum hi flexi, illae directi aeris sunt) ingeminato clangore atque tympanorum strepitu ad alacritatem inflammant (incendunt). Post dimicationem receptui cantant (canunt).

711. Velites usitate pugnae initium velitando faciunt. Mox toto agmine concurritur.

712. Eminus quidem lapides fundis et catapultis, tela balistis, glandes tormentis et sclopiis (stlopiis), jacula (spicula missilia) amentis ejaculando.

713. Cominus autem, sarissis et lanceis mucronatis (cuspidatis), hastisque et bipennibus magno nisu vibratis transverberando; caestibus, clavis, calis, aclydibus (tragulis) proturbando; frameis, pugionibus pungendo et confodiendo; ensibus, machaeris (sicis), acinacibus (harpis) caedendo.

714. Fit strages cruenta, cadunt promiscue hinc et hinc, ejulatu et boatu horrendo ac tremendo.

715. Conflictu durante succenturiati ex insidiis supervenientes a tergo adoriuntur (invadunt), aciem disturbant. Fugant, insectantur, contrucidant.

716. Illi terrore panico perculsi partim se dedunt, aut capiuntur; partim fugiunt et dispersi palantur.

717. Civitas rebellis et arx castrumve (quo se clade affecti et profligati recipiunt) circum sistitur, obsidetur, undique circumvallatur, angustatur, et machinis muralibus oppugnatur.

718. Obsessi cum praesidiariis propugnantes si erumpunt repelluntur, et impetu majore debellantur.

719. Expugnata ante ultroneam deditionem urbs diripitur. Aliquando et aboletur, ad internecionem exciditur, desolatur, et funditus evertitur.

720. Munimenta (procestria), si quae antea fuerunt occupata, recuperantur.

721. Victores adepta palma, spoliis et manubiis onusti, trophaeis erectis, ovantes, et paeana concinentes cum triumpho redeunt a certamine.

722. Ubi strenui ob heroica facinora insignibus condecorati nobilitantur; proditores, turbarumque auctores plectuntur; transfugae et desertores multantur; saucii sanantur; captivi redimuntur a redemptoribus, aut permutatione liberantur et

postliminio redeunt.

723. Ad extremum stipendiis (quantum quisque meruit) exsolutis, miles exauctoratur atque exarmatur, emeriti rude donantur. Qui pro patria occubuere, adorea afficiuntur.

LXVIII. DE SCHOLA ET INSTITUTIONE.

724. Quoniam literati ad omnia habiles esse, idiotae vice versa parum societati humanae conferre deprehenduntur, scholis (phrontisteriis), ubi rudes erudiantur, opus est.

725. At hae non sunt, ut fatui opinantur, carnificinae, sed ludus; dummodo discipulus docilis, calidum, cordatumque nanciscatur praeceptorem.

726. Ille enim si discit sponte, percontatur (quaerit) avide, et auscultat attente. Hic si docet lubenter, informat provide et inculcat assidue. Uterque eximio perfruitur delectamento.

727. Quod et paedagogi, ludimagistrorum adjutores, aliique quibus salaria (didactra, minervalia)

persolvuntur, attendant.

728. Adjungenda tamen institutioni disciplina, censura et ferula, ne vel dissolutio, vel desidia surrepat.

729. Qui monita (monitiones) non moratur, vapulet.

730. Cathedram docentes conscendunt; subsellia discentium sunt.

731. Calamo (cujus crena scalpello (scalpro) temperatur) scribimus in chartae vel membranae paginis. Stylo in pugillaribus (codicillis) ut expungi possit.

732. Si quid formator studiorum dictat, excipitur. Idemque mendas (soloecismos) quas in curia fudit emendat, commonstrans quod vitiose positum, adeoque dedocens quod dediscendum.

733. Memoriae quod mandare vis, relege et repete tecum frequenter: non cursim, obiter, et perfunctorie, sed rebus intentus, ita inhaerebit. Palmarium autem esto, gnomas ex Bibliis tirunculis

instillare.

734. Repetitio tacita est, recitatio clara, examen quotidianum vel extraordinarium.

735. Si feliciter proficere vis, quicquid modo comprehendisti, statim et e vestigio alteri enarra.

736. Decet enim te praeclarum praemonstratorem quacumque praeit studiose imitari, condiscipulos itidem certatim aemulari donec adaequaveris aut (solertia nempe fretus) viceris.

737. E trivialibus scholis, quae diligenter frequentandae sunt, promoventur classici gradatim ad gymnasia, ubi exercitia fervent. Inde ad academias (Lycea, Athenaea), quae baccalaureos, magistros, et doctores creant.

LXIX. DE MUSEO.

738. Idoneus musis locus solitarius est, a turba remotus, ubi studiosus bibliothecam, pulpitem, atramentariam cum calamario (graphiario) cultelloque scriptorio habebit.

739. Libellos (codices) munde tractet, quos non permultos sed selectos obtineat.

740. Quorsum enim, amabo, numerosa et in tomos divisa volumina, quorum indices vel catalogum vix perlegit possessor?

741. Lituris eos ne maculet. Asteriscis ad marginem notatis reminiscientiam sublevare nemo vetat, quin imo consultum est.

742. Si quid incidit, evanescere (excidere) ne patiaris. Annota protinus non in rejectaneas schedas vel pittacium sed in palimpsestum (membranam deletitiam), indeque in diarium vel adversaria, quae continuo penes te aut in promptu (obviam) sint. Opistographum utrinque

exaratum est.

743. Lucubranti ad
lychnum, cereus pro
sebacea candela conducit.
Cui accendendo
ignitabulum (ignarium,
chalybs) cum fomite
(suscitabulo), silice, et
suphuratis adsit.

744. Tedae fumant et
fumigant, qua de re
lucubrationibus insigniter
officiunt.

745. Candelabrum
(lychnuchus), sit pensile,
umbraculum viride,
emuntorium praesto, quo
identidem emunge, ne
ellyphnium obumbret, et
fungum, ne foeteat,
opprime.

746. Proditurus lucernam
absque laterna ne feras,
facibus (faculis) non
fidendum.

LXX. DE GRAMMATICA.

747. Grammaticus literas
orthographice juxta
calligraphiam et
etymologiam pingit
(majusculis sola
periodorum capita, et
emphatica), syllabas
copulat, dictiones
(vocabula) flexiles
comparat, movet, declinat
et conjugat. Phrases

syntactice construit, et
significationes (quid et
quomodo significant)
enucleat, sermonemque
interpunctum legitime
pronunciat.

748. Ancillantur huic
librarii et typographus,
eiusque operae, qui e
loculamentis typos
depromentes coagmentant,
prelo subjiciunt, libros
excudunt. Absolutisque
editionibus bibliopecto
(glutinatori, compactori
librorum) compingendos
tradunt: quos bibliopola
venundat.

LXXI. DE DIALECTICA (LOGICA).

749. Dialectus (logicus)
ratiocinans quid de quo dici
possit et quare perinvestigat,
ambigua distinguit,
obscura declarat, effecti
cuiusvis certitudinem
examinat; tractationes
(diexodos) intricatas
liquido explanat, atque in
sectiones (pericopas)
discindit.

750. De quocunque axiome, themate et quaesito (zetemate, problemate) disserens, de quaestionibus dubiis in utramque partem argumentando disputat, argumenta et consequentias syllogismis argute innectit, methodoque apta et apposita omnia digerit.

LXXII. DE RHETORICA ET POESI.

751. Rhetor disertus formulas discendi conquirat, ad facundiam (eloquentiam) stylum exercet, variat et colorat verba tropis (metonymia, ironia, metaphora, et synecdoche), illa nempe a nativo significato ad alium assimilatione quadam effectum transferens.

Orationem figuris (schematis) tam dictionum (quarum decem recensentur) quam totidem sententiarum expolit: idque

vel geminatione, vel iteratione, vel agnominatione euphoniam consecretans, vel logismo aut dialogismo auditorium permovens.

Actionem denique gestibus animat.

752. Facundus orator in panegyri declamaturus, aliquando abrupte auspicatur. Saepius exordio praemisso, sese insinuat, benevolentiam captans. Post, causam ex statibus (conjecturali, definitivo, juridicali) investigatam, oratorie proponit et dilucide. Tum confirmat persuasoriis rationibus valide, illustrat exemplis prolixè, tametsi non dilatet, vel amplificet, nec digrediatur abs re. Objectiones refutat (refellit) exacte, sed considerate. Epilogo qua praemeditate, qua ex tempore perorat.

753. Proverbia (adagia) et dicta (apophthegmata), ut et comparationes, orationem luculenter exornant: quam etiam nervosam vocamus quoties strictim et sententiose, comptam vero quoties Latine, hoc est, pure emendateque rem enunciat.

754. Sed poëta e prosa (soluta) ligatam faciens, versus et rhythmos concinnat eleganter; carmina (metrum) modulatur decenter; nuptialia carmina (epithalamia), funebria carmina (epicedia), propemptica*, inscriptiones (epigrammata), anagrammata*, etc. fingit ingeniose. Qui si excellit, laurea coronatur.

LXXIII. DE MATHESI ET
PRIMUM DE
ARETHMETICA.

755. Mathematicae
disciplinae pariter sunt
utiles et subtiles.

756. Arithmetica numeros
(decades, hecatontades vel
centurias, chiliades vel
millia, myriades vel
decades millia*) computat,
qui invicem compendiose
addantur, subtrahantur,
multiplicentur, dividantur:
sive id fiat cifris, sive
calculis (abaculis) super
abacum. Sed ruricolae per
decusses, duodenas,
quindenae, vicens, et
sexagenas supputant.

LXXIV. DE GEOMETRIA.

757. Geometra quasi
ludibundus figuras
contemplatur, et metitur
distantias, prope an procul
absit (distet) aliquid.

758. Ad amussim
(regulam) ducit lineas (puta
rectas, vel obliquas, non
curvas, spirales, aut
volutas) ad normam
angulos, circino vero
circulum, cuius punctum
medium, centrum, circuitus
seu ambitus, circumferentia

(peripheria) appellatur.

759. Conus turbinatus est; cylindrus teres; cubus quadratus; prisma laterosum; globus rotundus, externa superficie convexus, interna concavus.

760. Circularis figura absolutissima ac divinissima est, omnia complectens. Nihil habet asperitatis, nihil offensionis, nullas incisuras, nullos anfractus, nihil eminens, nihil lacunosum.

761. Omnis dimensio fit per triangulum (triquetrum). Pondere, mensura, numero Deus omnia fecit.

LXXV. DE MENSURIS ET PONDERIBUS.

762. Mensurae continuorum sunt granum, digitus, palmus, spithama, ulna, pes, passus, orgyia (id est, quinque vel sex pedes), decempeda, stadium, milliare, leuca. His metimur omnia.

763. Liquidorum: culeus, amphora, urna, congius, sextarius, hemina, quadrantal (quartarius), acetabulum, triental, cyathus, ligula.

764. Aridorum: medimnus (sex modii Romanorum), trimodium, modius, semodius, quartale (choenix), cotyla.

765. Pondera sunt: centenarius, continens ut plurimum libras zygostaticas centum, libra (pondo, as), semilibra (semissis), quadrans, uncia, duella, sicilicus, sextula, drachma, scrupulum. Unde emergunt dupondium (bilibre), tripondium (trilibre), quadripondium,

etc.

766. Si quid a libripende (zygostate) in bilance ad sacoma appenditur (penditur, libratur), examen quod scapo exit et per aginam sese agitat, pensita an stateram* aequet, ut aequilibrium sit.

767. Trutina monetariorum est. Statera lanificarum* est portatilis libra, altera parte uncinum habens, altera pondus, quod centro admotum plus, amotum minus ponderat.

768. Si quid superadjicitur (superpondio adaugetur) auctarium est (mantissa).

LXXVI. DE OPTICA ET PICTURA.

769. Opticus radios visus et visibilia objecta (unde ichnographia,

orthographia,
scenographia, totaque
sciagraphia dimanat)
scrutatur, cur alia sint
pellucida, alia opaca, alia
perspicua, alia obscura
discernens, et juxta id
conspicilia efformans.

770. Hinc pictor ad
exemplar vivi effigiem
delineat, penicilloque
discretis pigmentis linit,
variegat, interundat.
Encaustice aurificum et
figulorum, encausto sua
opera exornantium,
picturae species est.

771. Statuarius statuam
sculpsit et caelat, et super
basi (stylobate) collocat. Si
immanis est, colossum
dices. Si perelegans,
polycletium opus.

772. Solaria (sciaterica)
gnomone, clepsydrae fluore
(defluxu) horas
demonstrant.

LXXVII. DE MUSICA.

773. Musicus melodias
(melos) canit, et post
praeludia (praecentiones)
instrumenta pulsat.

774. Symphonia est
plurium concentus quorum
consonantia (harmonia)

grata est, dissonantia
absurda (absona).

775. Organum pinnis
tactilibus et fistulis constat;
cithara, nablium, testudo
(chelys), lyra, sambuca, [et]
pandura chordis quae
collabis (epitoniis)
intenduntur et remittuntur.

776. Fides plectro
(pectine) ut resonent
plectuntur.

777. Utriculus (tibia
utricularis) ab utriculario
inflatus et crembalum
discrepantes edunt sonos.

LXXVIII. DE ASTRONOMIA.

778. Astronomus siderum
motus considerat,
astrologus eorundem
efficaciam et influxus.

779. E fastis
(ephemeridibus) constat a
Natalitiis Christi Pascha
recedere ut minimum
trimestri, Pentecosten a
Paschate prope bimestri,
inde Adventum circiter
semestri.

780. Illic sunt Ianuarius,
Februarius, Martius, isthic
Aprilis et Majus, hic Iunius,
Iulius (Quintilis), Augustus
(Sextilis), September,
October, November;
December postremus est.

781. Quilibet istorum
mensium in calendario
Romano suas Calendas,
Nonas, et Idus habuit.

[1642 ed.]* Visum est heic
pro pueris adnotare versus
mnemonicos (memoriales):

Triginta Aprilis, Juni,
Septemque Novemque,
Uno plus reliqui, viginti
Februus octo.

Prima dies mensis
cujusque est dicta
Kalendae:

Sex Nonas Majus,
October, Julius et Mars,
Quatuor at reliqui: tenet
Idus quilibet octo:

Inde dies alios omnes dic
esse Calendas.

Quas retro numerans
dices a mense sequenti.

782. Intra triennium
(trieterida) accessio fit
mensis intercalaris
(embolimi), id est, decimae
—tertia lunationis.
Lustrum Iulianum
quadriennio quoque
completo bissextilem
annum reducit.

GEOGRAPHIA.

783. Geographus et cosmographus, regionum (etiam quas ipse non peragravit) situm describit, quae sint in continente, insulis, peninsulis; quae maritime, quae in mediterraneo, et quonam tractu; sub qua zona et climate vel parallelo; quos habeant hi aut illi accolae (paroecos) et quibus terminis (finibus) ab illis dispescantur et disterminentur; quos antipodes, perioecos, antoecos, etc.

LXXX. DE HISTORIA.

784. Quum res gesta narratur, historia est. Quum autem ficta, fabula.

785. Illas historicus recenseat, has annalium monumentis (chronicis) inserere capitale sibi ducat.

786. Et ut pateat genuina non supposita esse, rem simul cum circumstantiis in commentaria referat.

LXXXI. DE MEDICINA.

787. Sanis optima et maxime salutaris medicina diaeta est quia securissima et sine violentia.

788. Ne bibas vel edas nisi siti et fame stimulatus (quod saliva ad conspectum cibi palatum titillans innuet). Ita valebis et vigebis.

789. Quocirca appetitum praestolare jejunos.

790. Sed et invaletudo, si te incessit, abstinencia et quiete curatur, quod advertant qui non nisi saturi jejunant, nec nisi operatione fracti quiescunt.

791. Frictiones, fomentationes, embrochae, venae sectiones, cucurbitae, emplastra, malagmata, dropaces, cataplasmata, linimenta, cerata (cerota), nec non odoramina, suffimenta, et omnia forinsecus superimposita partim demunt tormenta, partim mitigant et leniunt. Ut et apophlegmatismi et collyria.

792. Remedia digerentia, purgantia (cathartica), evacuantia, sudorifera, [et] corroborantia efficacius medentur sive sint potiones, apozemata (decocta), sive pilulae (catapotia), sive illinctus, etc.

793. Adversus obstructiones alvo ciendae applicantur enemata (clysteria), vel balani (suppositoria) vel globuli. Antidotis (alexipharmacis) venena, amuletis fascina pelluntur. Haec etiam verbulo praefiscini.

794. Ex inspectione lotii et arteriae pulsu pertentato indicinam petunt vel conjecturam faciunt medici, praesertim diebus criticis et anno climacterico. Salsum in hos scommma est, solis licere impune occidere. Utinam non verum!

795. Gregales eorum sunt chirurgi et pharmacopolae. Hi pharmaca, unguenta (chrismata), serapia (syrupos), eclegmata (electuaria), condita, extracta, pastillos, trochiscos (orbiculos), [et] morsellos praeparantes in myrotheciorum loculis, forulis (thecis), pyxidibus (pyxidiculis), [et] alabastris sigillatim reservant. In praescriptionibus hisce utuntur notis, ne nescius sis:

	g.	Granum.
	ϥ	Scrupulus.
	ζ	Uncia.
	δ	Drachma.
	℔	Libra.
	S.	Semis.
	qt.	Quartarius.
	M.	Manipulus.
	P.	Pugillus.
satis.	q. s.	Quantum
libet.	q. l.	Quantum

LXXXII. DE ETHICA IN
GENERE.

796. Virtus in mediocritate consistit. Vitium est cum in excessu tum in defectu. Excedere enim et deficere transgredi utique est.

797. Si quis peccat

incogitantia, delictum (lapsio) est; si voluntarie, malitia; si studio, nequitia; si malitiose (maligne), scelus; si enormiter et spissius, flagitium; si ut aegre faciat alicui, perversitas.

798. Et talia qui patrat (designat) perditus est. Quem nec piget nec pudet, errati.

799. Qui perperam agere susque deque habet, pravus est. Contra, qui se a malo prohibet, probus: omnimode impollutus abhorret, detestatur et exsecratur omne impurum.

800. Consuetudo vitiosa sensim irrepit, cui sero obsistitur postquam invaluit. Quandoquidem radicata raro extirpantur.

LXXXIII. DE PRUDENTIA.

801. Ex dignitate
unumquodque aestimare
prudentiae statumen est, ne
res maximi momenti
postferantur
(posthabeantur) et nullius
pensi ac titivillitio vix
dignae magni pendatur.

802. Antequam inceptes
quidpiam, operae pretium
est accurate pensiculare
utrum debeas et possis et
utrum e re sit necne, ne
frustra (incassum) labores.

803. Sis cautus et
providus, prospice finem,
provide viam atque
modum, et attende
occasioni: praesertim si
quid paraturus es, ubi
praecauto opus est.

804. Nam insipientis,
stolidi, et dementis est
inconsulto [et] sine
intentione certa ferri;
insani, stulti, et vecordis
illicita appetere; perdeliri,
vesani, et furiosi
(lymphatici, furibundi)
impossibilia suscipere;
imperiti et inconsiderati
negligere opportunitatem.

805. Ubi inter plurima
datur optio, deliberandum
diu quod statuendum
semel; supervacaneis vero
supersedendum.

806. Et quicquid instituis
consulta exquisite. Itane, an

secus satius sit post
exsequere celeriter, sed
caute.

807. Circumspectus etsi
de eventu considit eumque
praecipit, circumspectat
tamen, ne sese praecipitet.

808. Quia usu venit, ut
tardus velocem (celerem,
pernicem), antevertat.
Pedetentim igitur
promoveat.

809. Quod abscondi
debet, non palam venditat.
Abstrudit, non obtrudit.

810. Quod ei non certo
constat, affirmare (asserere)
aut negare cavet; nedum ut
asseveret aut inficietur.

811. Nam ut credulitas, ita
diffidentia noxia (damnosa,
detrimentosa) est. Verum
longe magis, pertinacia et
pervicacia.

812. Si quis ergo aliquid
enarrat, suadet aut
dissuadet, adhortatur vel
dehortatur, non est
contumax, nec praefracte
repugnat, nec obstinate
contendit, sed obsequitur.

813. Praesagiens
quippiam adversi
praevenire censet melius
quam praeveniri. Atque
hoc sapientiae proprium
est.

814. Praepostera enim

cautio est, post acceptum
ictum demum
circumspicere.

815. Et dum quisque
suarum rerum satagit, ille
sibi nequaquam deest.

816. Vafer atque subdolus
versute nimis versat omnia.
Suspica est dolosus.

817. Veterator astu
imponit incautis et praeter
caeteros bonis, qui deceptu
faciliores sunt.

LXXXIV. DE TEMPERANTIA.

818. Depravatio nobis
innata (ingenita) perquam
multa concupiscit, sed
temperans cupiditates
moderatur.

819. Sobrietas est
continentia a superflua
alimonia.

820. Gulosus et catillo
ligurit et pitissando sorbet.
Helluo (epulo) cum
comessatoribus suis
vorando sese ingurgitat et
crapulatur. Lurco
(barathrum, gurges,
vorago) comessando sua
decoquens ac dilapidans,
nepos et decoctor audit.
Omnes autem mera

abdominis mancipia sunt.

821. Compotores et compotrices meracius hauriunt, seque benignius invitant quum estur de symbolis, quas alii persolverunt.

822. Veteres temperabant merum aqua et victitabant simplicissime. Nunc quot gulae illecebrae, tot ad perniciem irritamenta.

823. Ebrius enim et bene potus noxam (poenam) habet crapulam; ebriosus tremorem et scotoma. Sobrii atque abstemii mente valent, temulentos amentia dementat.

824. Ubi potores inebriati brute bachantur, ibi titubatur, screatur (excreatur), vomitur, meitur (sit honos auribus), peditur, et cacatur.

LXXXV. DE CASTITATE.

825. Castus est qui se libidine vel fanda vel nefanda non contaminat. Lascivire enim belluinum est.

826. Caeterum non adulteria solum, incestus, stupra, scortationes et concubitus illegitimi, sed et omnis opica et venerea salacitas, basiationes (basia, suavia), immo cogitationes immundae et obscoenae impudicitia sunt.

827. Adulter (moechus) extrarium (alienum) polluit torum, scortator suum. Incontinens pellicem (pellacam) vel concubinam sibi adsciscit. Ganeo per lupanaria grassatur. Meretrices (scorta, prostibula) pellaces prostant, et pudicitiam suam prostituunt. Lenones (balliones) atque lenae lenocinantes, alios in suis fornicibus inquinant (foedant).

828. Vah propudia! Foedi et execrabiles penitus omnes.

829. Moratur, imo insanit,
qui deperit feminam
impudice.

LXXXVI. DE MODESTIA.

830. Modestus verecunde
agit, procacitatem defugit.

831. Non frivolus est, ut
ut quadantenus blandus et
comis: non loquax aut
morologus sed taciturnus.

832. Nec tamen morosus
aut torvus sed gravis:
severus, non saevus.

833. Nihil immoderate
laudat vel vituperat
(redarguit, culpat,
reprehendit). Neminem
traducit, cavillatur, aut
diffamat. Ad opprobrium
neutiquam silet.

834. Immo nec pejerat,
nec dejerat, nec jurat
temeriter. Si vero juraverit,
juramenti (jurisjurandi)
servantissimus est.

835. Nemini adversatur
importune, aut facessit
molestiam, aut scandalo
(offendiculo) est. Nec
quenquam sciens volensve
contristat.

836. Famam et rumores
non vulgat sed percontatur

prius scrupulose, iisque nisi
crebrescentibus
exploratoque cognitis,
assensum non accomodat.

837. Curiosus ardelio
ingerit (intrudit) se et
immiscet ubi eius nihil
interest, etiam quae
celantur eliciens.

838. Locutuleius verbosus
est, nugator facta infecta
loquitur (blaterat), garrulus
aniles ineptias blatit, futilis
arcana effutit, sophista
(cavillator) captiosus est,
momus omnia carpit et
sugillat.

839. Consideratus non
quidem elinguis est, sed
tamen non insulsus blatero.
In garritu enim multo
vanitas.

840. Submissus demisso,
non elato aut tumido animo
est. Non sibi arrogat quod
non habet, nec aliis sua
derogat. Non ambit et
anhele aspirat ad fasces,
purpuram, diadema,
aliasque dignitates. Nec sua
profuse jactat, aut ostentat,
aut extollit, aut in iis

gloriatur, aut se insolenter
effert aliisque praeponit,
sed submittit potius et
deprimit. Ideoque
exaltabitur.

841. Praeconia vulgi non
affectat, ut abjecti quidam
plebicolae, nec sibi anteferri
alios moleste fert.

842. Festivi joci,
leporesque et allusiones
facetiae urbanos decent.
Rusticitas barbariem
redolet.

843. Scurrilitas
summopere discavenda,
nec minus assentationes
parasiticae.

844. Cavillatio virulenta,
sanna postica sannionibus
reliquenda.

845. Renidere et blade
ridere morati est,
cachinnari incivile.

LXXXVII. DE AUTARKEIA.

846. Avarus per fas et
nefas ditescere annititur,
cum tamen superna
benedictio Domini ditet.

847. Et cui usui in
immensum coacervatae
(cumulatae) divitiae,
malorum invitamenta et
irritamenta cum male parta
male dilabantur?

848. Adeo desipiunt
divites quidam ut bonis
affluentes et cistas pecunia,
scrinia cimeliis, et cameras
supellectile confertas
possidentes, egestatem
timeant: videlicet in copia
inopiam, in abundantia imo
redundantia penuriam.

849. Tu si pecuniosus es
tibi que opes affatim
suppetunt, egenis inde
suppedita. Sin minus, etiam
de modico imperti, si non
largiter saltem liberaliter.

850. Satius enim est
liberalem esse quam nimis
parcum, et elargiri beatius
quam acceptare.

851. Frugalis paucis
contentus est. Non tenax
quidem est, sed
parsimoniae tamen navans
operam.

852. Frugalitas, quantum
sit vectigal si luxuriosus
pervideret, fastu et luxu
patrimonium non
prodigeret.

853. Pauperat enim
dispendium; compendium
opulentat.

854. Tu ergo quidquid
accipis et expendis, in
codicem accepti ex expensi
refer.

LXXVIII. DE JUSTITIA: ET PRIMO COMMUTATIVA.

855. Iustitia suum cuique tribuit.

856. Ergo qui cum alio transegit et quicquam promisit (pollicitus est), condixit (recepit): sive ultro et sua (suapte) sponte sive exoratus, et quibuscunque conditionibus aut exceptionibus, ei standum est pactis et promissis firmiter.

857. Qui stipulanti adstipulatus est, obligavit se, sit illud licet in leviculis.

858. Depositum reddendum est, non abnegandum, non supprimendum.

859. Nil quod alterius est tibi eo insciente vindica (assere) aut usurpa.

860. Quod utendum accepisti, idem restitue (redhibe), non aliud: et quidem, quoad eius fieri potest, absque detrimento.

861. Quod mutuo datum (mutuatium) est, pro eo aliud licet remittas, paris tamen aestimii.

862. Si quis a te mutuatur, ei mutua et commoda. Chirographum tamen, vel arrhabonem, seu pignus, vel praedam aliamve cautionem postula.

863. Quia ob mortalitatem debitorum, quin et fidem lubricam, cautela opus est.

864. Qui supra sortem (summam primitivam) foenus (usuras) exigit, sive uncinarum* (centesimam [per mensem], duodecim pro centum [per annum]) sive semunciarum* (semissem, sex pro centum), non creditor est sed foenerator (danista). Pessimus autem et nequissimus, qui anatocismis debitorem devorat, quod nefarium.

865. Iniquus vero sibi ipsi est qui alieno aere ita se obruit, ut versura solvere vel auctionem facere et tandem argentariam dissolvere (foro cedere) cogatur.

866. Proinde debita (nomina) quam ocissime exsolve, et apocham (acceptilationem) qua acceptum tibi referatur flagita.

867. Furta, rapinae, sacrilegia, peculatus, plagium, [et] abactus aequae in illo mandato, *Non furaberis*, interdicta sunt.

868. Privari enim et orbari rebus suis nemo debet. Qui contra aliquid committit, repetundarum tenetur.

LXXXIX. DE JUSTITIA
DISTRIBUTIVA.

869. Praemiis et poenis in officio continentur omnes.

870. Ergo qui laudabiliter agit, collaudationem (applausum), commendationem, promotionem, [et] honoraria meretur. Qui secus, expostulationem, reprehensionem, vituperium, probra, et castigationem. Sed pro personarum tamen discrimine.

871. Qui nolens et inscius maleficium admisit commiseratione dignus est. Simplicitati igitur id imputa, non opprobra rigide. Qui data opera facinoris se alligat iure meritoque punitur; qui alieno instinctu et impulsu, non omnino excusatur.

872. Afflictionem afflictis ne auge, sed suppetias

ferendo minue quum eas implorant.

873. Adjumento qui eget, eum obnixe petere, obtestari, obsecrare, supplicare, numne (numquid) pigebit?

874. Superbus mendicus nil emendicat. Importunus vero flagitator odiosus est et repulsam feret.

875. Quum impetraveris quae rogasti, gratias age (refer).

876. Quod quis non rogatus largitur, modeste primum recusa. Sed pertinaciter ne respue, ne contemnere (aspernari) videaris tibi que ceu ingratitudo exprobre tur (objectetur).

877. Gratitudinis grades sunt, beneficium (beneficentiam) agnoscere, laudare, pensare.

878. Munem (officiosum) esse et munera remunerare (retribuere) opulentorum est.

879. Acceptis hospitibus xenia, necessariis strenae mittuntur.

880. Conspicuos et dotibus singularibus

antecellentes honora,
reverere, et suspice.
Neminem licet invalidum
despice.

881. Prosis omnibus, obsis
nemini, fausta precare
universis.

XC. DE FORTITUDINE.

882. Magnanimus est qui
secunda nec non adversa
indifferenter ferre potest.

883. Nihil vulgare
admiratur. Ad repentina
(praesertim panica) non
consternatur. Labores ad se
attinentes non detrectat, et
quibus se laboribus addixit,
eos alacriter subit
strenueque urget. Pericula
inevitabilia si imminent
(impendent, instant),
intrepidus adit et animose
suffert, audaciam modo et
temeritatem refugiens.

884. Propterea quod
coepit continuat. Fessus
tamen et lassus paulum
interquiescit, ne operam
perpetuans defetiscatur ac
succumbat.

885. Pusillanimus ex
adverso prosperis
intumescit, calamitosis
subsedit et animum
despondet, inopinis
percellitur, ad quemvis
strepitum effeminate
trepidus et querulus est,
mutire vel hiscere vix
audet.

886. Inter fortem ergo et ignavum (pigrum) quantum interest! Ille munia (partes) sibi commisa solícite agit, hic negligenter; ille sedulo, hic socorditer; ille enixe, hic remisse; ille accurate, hic defunctorie; ille quiete, hic proterve et praecipitanter; ille nihil cunctando, hic omnia procrastinando; ille sine intermissione (pausa) in proposito decoro pergit, hic desultorie tergiversatur et restitat. Uno verbo, ille viget ubique, hic torpet ubique.

887. Desidibus et otiosis semper feriae sunt. Etiam profestis diebus juxta ac feriatis otiantur et vagantur.

888. Navus (gnavus) etiam in otio negotiosus est et pigritiae fugitans.

XCI. DE PATIENTIA.

889. Aerumnosam ac miseram conditionem deplorare quid prodest, si non datur in melius commutare aut ex ea eluctari?

890. Patiens gemit, lacrimatur, flet, non autem plorat, ejulat, lamentatur,

quiritat, aut aegrimonia
fastidiosa se emaciat
(emacerat).

891. Injurias ulciscendo
non rependit aut retaliat,
sed aequanimiter tolerat,
extenuans potius quam
exaggerans.

892. Indignatur quidem
indigne factis et malevolo
obloquitur, sed non
effervescit in vindictam
(ultionem), nec vehementer
invehitur aut stomachatur
in quenquam. Infensus est
alicui, non infestus.

893. Iram cohibere,
ignoscere, et condonare
culpam, parcere etiam
inimicis sedati animi est;
exardescere, fremere,
furere, minari, maledicere,
diras imprecari, impotentis
et sui non compotis.

894. Impos enim sui est,
qui eo usque excandescit,
ut se reprimere nequeat.

895. Generosus autem
animus mavult mitis esse

quam atrox, mansuetus
quam ferus, benignus
quam truculentus (trux),
palacabilis quam dirus.

896. Saevitia enim,
immanitas, et crudelitas
(quam mulcere non possis)
belluina est. Necessitas
autem durum telum.

XCII. DE CONSTANTIA.

897. In honesto instituto
immote atque firmiter
persistere constantiae est;
non perseverare, levitatis.

898. Sed heus, aliud est
constantem, aliud
pervicacem esse.

899. Si quis te bonitati
deditum labefactare
indeque divellere attentet,
obfirma animum et obstina
usque dum obstacula
perrumpas et perfringas.

900. Caeteroqui rata irrita
reddere dedecet.

XCIII. DE AMICITIA ET HUMANITATE.

901. Si conversationem
tuam ei quicum versaris vis
esse amabilem, esto
inferioribus humanus et
affabilis, erga aequales
officiosus, superioribus
venerabunde obediens. Ita
inibis gratiam.

902. Si quem convenis aut praeteris, amanter salutare, salutantem vero resalutare, discedentem abs te tibi que valedicentem aliquousque comitari, ne dedignator.

903. Interroganti responde placide, saltem annuendo vel abnuendo (renuendo).

904. Loquentem ne interpella. Nescienti tamen aliquid si tibi succurrit, suggere eum qui te opperitur, ne morator.

905. Cuicunque gratificari potes ulla re, ne refragator aut gravator, vel gratis (gratuito) si expetat opitulans.*

906. Si quis indiget consilio, consule; si consolatione, consolare; si subsidio, subveni et auxiliare, nec moras nocte; si suffragio, suffragare. Sic omnium demereberis benevolentiam et favorem. Aegrotos autem visitare et solari praecipue theologorum est.

907. Laesit te quis? Connive, et suffundes eum rubore. Si poenitet fecisse, da veniam, et oppido eum tibi devincies ac obstringes.

908. Si quem ipsemet

offendisti, eum alloqui (affari), pacare, placare, iram ejus deprecari, eique reconciliari, ne pudeat. Non dicis ergo, sed serio.

909. Simultatem inveterascere non sines, ne in odium transeat.

910. Contubernales et convictores concors unanimitas condecet. Qui enim aliter in contubernio vel in convictu una versabuntur?

911. Dissensiones ac dissidia quin intercedant quandoque et oboriantur haud est possibile. Sed concordia redintegranda est tolerantia mutua, et dissidentes per ultro citroque commeantes proxenetas conciliandi, ut sopitis discordiarum flabris unanimes et perseveranter concordent.

912. Felices successus habet aliquis? Ne limis eum specta. Fave illi potius. Infortunium? Commiserare. Misericordis enim est miserorum misereri.

913. Veracitati imprimis stude. Mendacio nil tetrius. Qui comminiscitur quod mentiatur exosus est.

914. Si quid tibi innotuit
quod pervagatum non est,
ne enuncia antequam
percrebrescat. Multo minus
si secreti quid commissum
est divulga, ne resciscat
illud a te alius, etiamsi
curiose percontetur. Tace,
inquam, mussa (mussita).
Taciturnitas tua nemini
incommodabit, te vero
apprime commendabit.

915. Inter hilares tetricus
ne sis, nec tamen effuse
laetus.

916. Nec in alios dicax
esto. Si quid sermocinando
lepidi ac festivi admisceas,
sales sint, non cavilla;
allude, non vellica, ne
quem praesentium lacescas,
absentium calumnieris.

917. Nam iurgari et de
lana caprina (quod ajunt)
rixari (vitilitigare)
agrestium est ac
vitilitigatorum; criminari et
deferre, susurronum et
scurarum; convitiari et
contumelia afficere
(convitiis urgere,
verberare), nebulonum.

XCIV. DE CANDORE.

918. Cum quo necessitudo (familiaritas) tibi est, erga illum apertus sis sine fraude (techna) doloque (fallacia). Amicum enim fautoremque fraudare et fallere, quae gloria?

919. Fideli socio fidus esto, nec clam illo quasi furtim in ejus fraudem quicquam occipe. Nam versipellis qui perfide agit sibi perditionem machinatur.

920. Si quid in quopiam taxandum est, non clam illo fiat sed coram in os, modo tempestive absque acrimonia et amarulentia.

921. Ab amicitia nihil alienius assentatione.

922. Conspicaris crimen? Ne dissimula, sed mone, increpa, objurga illius reum. Etenim cur id te non cernere simules?

923. Si proximus deliquit, aperte corripe et corrige. Adulari versutorum et impostorum est.

924. Si quis utilia loquitur, assentire. Sin inutilia, ne assentare.

925. Palpum et offucias
insidiosis ac perfidis
relinque; deblaterationes ac
nugas loquaculis et
nugivendis. Tu candide,
sincere, et prudenter omnia
age atque loquere.

926. Veritatem ingenue
fateri ne verecundator,
prout ejus tibi conscius es.
Cur enim adjurari velis?

927. Quorum tibi nondum
exploratus est candor, eis
familiarem te non
exhibebis. Caeteroquin
contemptum incurres
(despicatui habeberis).

928. Ignotis blandiri noli,
ne te sibi insidiari
existiment et imposturam
extimescant.

XCV. DE CONVERSATIONE ERUDITA.

929. Cui ab
occupationibus vacat, vadat
ad congerronem. Eum
tamen cui invisus es ne
invisas, sed missum facias.

930. Cujas sit dilectus
sodalis, nobilis aut
ignobilis, ignominiae tibi ne
ducas, dummodo sit frugi,
et ad ingenium tuum
congruat. Infamibus ne te

conjungas.

931. Sodalitia dissoluta et nauci devita. Vitiant enim mores.

932. Docti deambulationibus delectantur sive meditandum est sive confabulandum.

933. Cum in aprico spatiari taesum est, considetur in umbra.

934. Nae pulchrum et scitum est, cum dissitis colloqui et quidvis significare posse non per nuncios sed per internuncias literas.

935. Antiqui in tabellis ceratis (ut deteri aut deleri scriptura posset) exarabant, et cum iis tabellarios mittebant. Nobis papyrus et atramentum commodius inserviunt.

936. Epistola longa complicata ne legi queat, nisi ab eo cui destinatur, obsignatur sigillo, resignanda (nisi intercipitur) illi ad quem inscriptio spectat.

937. Cognomen intus subscribitur una cum

praenomine et agnomine, si
tanti sit.

938. Schedula non
sigillatur.

XCVI. DE LUDICRIS.

939. Ne labascant fragiles
vires aut elanguescant, a
seriis quandoque cessa et
cum coetaneis (dis pares
enim non bene sociantur)
defatigatum te ludicris
recrea et relaxa.

940. Spectacula enim
delectant, commotio
vegetat.

941. Facetiis, dicteriis, ac
aenigmatibus certare
ingeniosum est:

pila,

harpasto (qui minor est
folle et major paganica),

impostoria,

sphaera,

in sphaeristerio,

conis,

trocho,
turbine,
tubulo sambuceo (quo elisa glande stupea strepitum cient),
globulis,
myinda,
par impar,
oscillo (oscillatione),
basilinda,
apodidrascinda,
cindalismo, etc. puerile,
chartis (tabulis) lusoriis,
talis (tesseris), alea, fritillo (pyrgo, turricula), aleatorium,
micare digitis Italorum.
Ascoliasmus empusae est. Latrunculis (quibus quidam privilegiarii rusticelli Saxonici in Ducatu Brunswicensi praecellunt) ludere operosum.
942. Ubi si quis ad incitas redigitur, actum est de eo.
943. Choreis et tripudiis lascivi se exercent, ibique ridiculas gyrationes rotant lascivia petulci.
944. Grallator grallis gressus spatiosos divaricat.
945. Luctatores (athletae) et petauristae sane perquam audaculi sunt:

audaciores adhuc
funambuli (schoenobatae,
neurobatae).

946. Cursores a carceribus
ad metam curriculo
festinant, et primus
brabeum aufert.

947. Alii designant
(praetendunt) lineam,
quam simul ac attigerunt
consistunt protinus. Qui
ultra procurrerit aut cis
(citra) eam substiterit,
ludum perdit.

948. In circo equitando, in
agone luctando et
reluctando uter alterum
supplantaret concertabant.

949. Gladiatores et
pugiles in palaestra (arena)
congregiuntur, lanista
directore.

950. Cum duo
digladiantur, est
monomachia: et quidem
internecinum duellum si ad
alterius internecionem.

951. Gesticulator (agyrta,
praestigiator) actionis
mirifica volubilitate
(agilitate) oculorum aciem
praestringit, et frustratur
spectatores. Sed praestigiae
sunt, non miracula.

952. Mimus et histrio
personam alterius exprimit,

persona (larva) ut
plurimum obvelatus.

953. Comoedia
perplexum actum
repraesentat, sed cum
jucunda catastrophe.
Tragoedia tristem habet
exitum.

954. Theatra et
amphitheatra tam
temporaria quam ad
perpetuitatem exaedificata
in propatulo sunt. In illis
scena sipariis velatur.
Orchestra spectationi
primariorum, cavea,
promiscuae plebeculae
dicatur. Pulpitum in
proscenio actoribus scenicis
accomodatum est. Lucar ab
inspecantibus datur.

955. Bacchanalia larvati et
lymphati peragunt.

XCVII. DE MORTE ET SEPULTURA.

956. Moribundorum
speciale indicium est stertor
lethalis, lethargus, et ocelli
concidentes.

957. O mortales,
quotusquisque vestrum
reputat ab hoc puncto
aeternitatem pendere?

958. Nam ut exspiraveris,
interusurio vitae finito,
confestim anima ad coelos
vel Tartara migrabit.

959. Funus funestis ritibus
adornatum, id est, a
pollinctore pollinctum,
lugubriter indutum, capulo
(loculo, arca) conditum,
sandapilae impositum, a
vespillonibus effertur.

960. Fiunt exsequiae
coemeterium versus,
pompa funebri: et sepelitur,
hoc est, infertur sepulchro
(conditivo) atque
inhumatur (humo
mandatur).

961. Prisca antiquitas
exanima (demortua,
lethata) corpora exstructo
rogo (pyra) in ustrina
concremabat, conditis urna
cineribus et odoratis
liquoribus large conspersis.
Inde sepulcra busta sunt
dicta.

962. Eriguntur cippi et
epitaphia, epicedia
cantantur. Parentatur etiam
solemniter sed non nisi
optime meritis encomioque
evehendis.

963. In gentilismo
conductae praeficae
plangebant et capillos
laniabant, lessis* et neniis
lugubribus elogia denati
enumerantes.

964. Et ne manes
oberrarent, justa
(parentalia) inferiis et
feralibus epulis faciebant.

XCVIII. DE PROVIDENTIA DEI.

965. Atque ita mors suo
interventu finit omnia.

966. Omnia enim
temporalia fluxa, decidua,
momentanea, ac transitoria
sunt. Exoriuntur et
occidunt, nascuntur et
denascuntur, succrescunt,
decrescunt, et intereunt
plane.

967. Etiamsi aliquid
stabile videatur, vetustate
ipsa atteritur, et decedit.

968. Vicissitudinibus
subitaneis subjacent omnia.

969. Atheus tamen est qui
temere volutari autumat res
nostras. Fatali lege
divinitus sancita succedunt
omnia.

970. Fors et fortuna nihil
sunt, nisi confictae a
gentilibus voculae.

971. Fortuitos quidem et improvisos casus esse concedo, sed nostri respectu, non providentiae, quae minutissima etiam nutu suo dirigit.

972. Nam et capillos nostros numeratos esse testatur salvator, ut ne quidem unicus absque Dei voluntate perire queat.

973. Ea propter insolitas mutationes, ostenta, prodigia, et portenta antecedunt.

974. Insunt ergo omina rebus.

975. Sed usquequaque ominosa praesagia captare superstitio est. Si tibi Dominus aliquid maniferstare (revelare) dignabitur, non te latebit.

976. Operae pretium facturus pius esto, et sine intermissione ora. Non te derelinquet ille qui aequè praedestinavit quod cras, perendie (perendino die), et deinceps (posthinc) de te futurum sit, ac quod heri, pridie, et abhinc usque et usque factum est.

977. Fatum tuum ne anticipa, sed exspecta.

XCIX. DE ANGELIS.

978. Produxit et

invisibiles angelos, eosque innumeros (innumerabiles), aeternum numen ad regenda inferiora sibi administros.

979. Non quod opis esset indigus, sed quia sic est placitum.

980. Constituerat hos in coelo supremo (empyreo), sed quidam desciverunt (defecerunt) ab eo per superbiam, deturbatique sunt ad infernum. Quem et Orcum et Erebum et Avernum antiquitus jam olim ethnicismus appellitabat.

981. Qui in sua integritate permanserunt, ita perroboreti sunt, ut abscedere a vero et prolabi amplius non possint.

982. Circa thronum creatoris sui millia millium (myriades) adstantes eum venerantur, adorant, celebrant.

983. Amandati obeunt mandata, legationeque functi revertuntur (reditant) quam celerrime.

984. Associant se jussu Dei piis jam inde a nativitate tamquam custodes, ut mala averruncet et ab insultibus Satanae eos protegant.

985. Verum enim vero quod de binis cujusque geniis, bono et malo, quidam asserunt incertum est.

986. Apparent

nonnunquam sed disparent
rursum, non fascinando sed
revera.

987. Cacodaemones
obversantes spectra
vocantur; tumultuantes per
noctem intempestam,
lemures; famulantes, lares
et penates.

988. Magi et necromantici
cum daemonibus
colludentes incantamentis
suis seipsos et alios
ludificantur.

989. Sed vae diabolo et
(nisi communioni
renuncient) consortibus
ejus! Ad Gehennam
detrudentur.

990. Vindex enim erit
gloriae suae omnipotens.

C. CLAUSULA.

991. Cedo sodes (age sis),
quid adhuc restat?
Hactenus enim tradita
(absit arrogantia dicto)
utcunque sum
consequutus.

992. Siccine? Hem, macte
esto sedulitate ista. Restabit
igitur ut per hanc januam
ingressus scientiarum et
Latinitatis palatia vivide
lustrare properes, et quae
heic raptim aspexisti
uberius in autoribus bonis
et probatis speculeris.

993. Habes heic synopsis
summatim et succincte
complectentem, rudimenta
qua theologiae, qua
philosophiae. Quae quasi
per periochas breves
compendiario tibi definient
ea quae commentatores
fuse ac copiose per
paraphrases in suis
exegeticis enucleant. Nihil
tamen tantopere
necessarium omissum
reor.

994. Auctarii loco
admoneo, ut ad pietatem
convertas omnia, ut
Christicola orthodoxus
cluas, et a fucatis fictisque
pseudochristianis, qui
nomine tenus tantum
Christiani sunt, quam
longissime absis. Sitque
Christus actuum et
cogitationum tuarum
Cynosura et Helice.

995. Scito enim fore
propediem ut redamus
rationem omnium quum
venerit, ut excitet nos et
judicet, ubi manifesta et
occulta patefient.

996. O beatos qui tunc
eum propitium habebunt!
Exultim una gaudebunt,
non ambrosia et nectare (ut
impie poetantur ludiones
poetici) sed illius salutifera
suavitate in sempiternum
beandi.

997. Faxit miserator
noster, ut heic misericordia
ejus justificati in charitate
(sincero illo credentium
coagulo) coalescamus.

998. Tu ei confitere ac
vota vove, religioseque et
fervide precando penetralia
aeternae mansionis penetra,
ut jam nunc coelitibus
annumereris.

999. Ave et vale.

1000. Jehovae Zebaoth,
indiviuae ac sacrosanctae
Trinitati, honor sit et laus in
seculae seculorum, AMEN.